


柳田文庫
文庫11
D 292
8



文庫 11
D292
8

宋史卷三十三

本紀第三十三



開府儀同三司上柱國鎮國軍事節度使兼京兆尹判選事都總裁脫脫等脩

皇明朝列大夫國子監祭酒臣方從哲

承德郎右春坊右中允管國子監書畫正黃女良等奉

勅重校刊

孝宗一

孝宗紹統同道冠德昭功哲文神武明聖成孝皇帝諱
昚字元永太祖七世孫也初太祖少子秦王德芳生英
國公惟憲惟憲生新興侯從郁從郁生華陰侯世將世
將生慶國公令諡令諡生子稱是為秀王王夫人張氏

萬曆二十七年刊

宋史卷三十三

本紀

一

010190564229

夢人擁一羊遺之曰以此爲識已而有娠以建炎元年十月戊寅生帝于秀州青衫牌之官舍紅光滿室如日正中少長命名伯琮及元懿太子薨高宗未有後而昭慈聖獻皇后亦自江西還行在后嘗感異夢密爲高宗言之高宗大寤會右僕射范宗尹亦造膝以請高宗曰太祖以神武定天下子孫不得享之遭時多艱儀落可憫朕若不法仁宗爲天下計何以慰在天之靈於是詔選太祖之後同知樞密院事李回曰藝祖不以大位私其子發於至誠陛下爲天下遠慮合於藝祖可以昭格天命參知政事張守曰藝祖諸子不聞失德而傳位太宗過堯舜遠甚高宗曰此事不難行朕於伯字行中選擇庶幾昭穆順序而上虞丞婁寅亮亦上書言昌陵之後寂寥無聞僅同民庶藝祖在上莫肯顧歆此金人所以未悔禍也望陛下於伯字行內選太祖諸孫有賢德者高宗讀之大感歎紹興二年五月選帝育于禁中三年二月除和州防禦使賜名瑗壬寅改貴州五年五月用左僕射趙鼎議立書院宮中教之旣成遂以爲資善堂帝讀書彊記天資特異己亥制授保慶軍節度使封建國公六月己酉聽讀資善堂以徽猷閣待制范冲兼翊善起居郎朱震兼讚讀高宗命帝見津震皆拜十二

年正月丁酉加檢校少保封普安郡王三月壬寅出閣
就外第十三年九月秀王歿于秀州十四年正月庚辰
用廷臣議聽解官行服十六年四月乙巳免喪還舊官
十七年六月戊午改常德軍節度使二十四年衛州盜
起秦檜遣殿前司將官辛立將千人捕之不以聞帝入
侍言之高宗大驚明日以問檜檜謂不足煩聖慮故不
敢聞俟朝夕盜平則奏矣檜退知爲帝言忌之及檜疾
篤其家秘不以聞謀以子燿代相帝又密啓高宗破其
奸三十年二月癸酉立爲皇子更名瑋甲戌詔下丙子
制授寧國軍節度使開府儀同三司進封建王制出中

外大悅四月賜字元環三十一年十月壬子以明堂恩
改鎮南軍節度使先是金人犯邊高宗下詔親征而兩
淮失守朝臣多陳退避之計帝不勝其憤請率師爲前
驅直講史浩以疾在告聞之亟入爲帝言太子不宜將
兵乃爲草奏因中宮以進請衛從以其子職高宗因亦
欲帝徧識諸將十二月遂扈蹕如金陵三十二年五月
甲子立爲皇太子改名昀初高宗又有禪位之意嘗以
諭帝帝流涕固辭會有邊事不果及歸自金陵陳康伯
求去高宗復以倦勤諭之中書舍人唐文若聞而請對
言不宜急遽故先下建儲之詔賜名燁監察御史周必

大密與康伯言與唐昭宗名同音不可詔別擬進乃定
今名既又命學士承旨洪遵爲太子擇字遵擬四字以
進皆不稱旨甲戌御筆賜字元永乙亥內降御札皇太
子可卽皇帝位朕稱太上皇帝退處德壽宮皇后稱太
上皇后丙子遣中使召帝入禁中面諭之帝又推遜不
受卽趨側殿門欲還東宮高宗勉諭再三乃止於是高
宗出御紫宸殿輔臣奏事畢高宗還宮百官移班殿門
外拜詔畢復入班殿庭頃之內侍掖帝至御榻前側立
不坐內侍扶掖至七八乃略就坐宰相率百僚稱賀帝
遽興輔臣升殿固請帝愀然曰君父之命出於獨斷然

此大位懼不克當班退太上皇帝卽駕之德壽宮帝服
袍履步出祥曦殿門冒雨掖輦以行及宮門弗止上皇
麾謝再三且令左右扶掖以還顧曰吾付托得人吾無
憾矣左右皆呼萬歲是日詔有司議太上皇帝太上皇
后尊號以聞在內諸司日輪官吏應奉德壽宮增置德
壽宮提點幹辦等官德壽宮宿衛依皇城及宮門法丁
丑朝德壽宮戊寅大赦詔宰相率百官月兩朝德壽宮
巳卯以卽位告于天地宗廟社稷庚辰詔五日一朝德
壽宮以左武大夫龍大淵爲樞密副都承旨武翼郎曾
覲帶御器械癸未始御後殿甲申詔中外士庶陳時政

闕失丙戌詔進宰執官二等丁亥詔以太上皇不許五日一朝自今月四朝復除名勒停人胡銓官知饒州己丑詔有司月奉德壽宮緡錢十萬辛卯詔罷四州市馬壬辰詔百官日一人入對癸巳蝗甲午上太上皇帝尊號曰光堯壽聖太上皇帝太上皇后曰壽聖太上皇后乙未晦金人屠原州秋七月戊戌興州中軍統制吳挺復鞏州庚子判建康府張浚入見以雨水飛蝗令侍從臺諫條上民間利害壬寅詔戒飭諸郡守臣癸卯以張浚爲少傅江淮宣撫使封魏國公甲辰以參知政事汪澈視師湖北京西遣劉琪等使金告卽征戊申以四川

宣撫使吳玠兼陝西河東路宣撫招討使追復岳飛元官以禮改葬是夜地震大風拔木己酉有事于太廟別廟癸丑馬軍司中軍統制趙撝忠義軍統領皇甫侗復光州甲寅朝獻景靈宮詔淮南諸州存恤淮北來歸之民權免稅役丙辰以少保保康軍節度使吳玠爲少傅太尉寧武軍節度使吳玠爲開府儀同三司丁巳罷李寶措置海道戊午恩平郡王璩入見庚申以御前軍器所仍隸工部辛酉詔後省省詳中外上書有可采者以聞壬戌以黃祖舜兼權參知政事罷諸路聖節進奉詔李顯忠軍馬聽張浚節制癸亥增將士戰傷死者推恩

格詔蠲四川積年逋負八月乙丑朔四川馬軍統制高
師中與金人戰于推沙敗死丙寅吳璘與金人戰于德
順軍已巳以翰林學士史浩爲參知政事戊寅率羣臣
詣德壽宮奉上太上皇帝太上皇后尊號冊寶丁亥班
寬恤事十八條起居舍人洪邁知閣門事張掄坐奉使
辱命罷甲申吳璘敗金人于北山戊子追復李光資政
殿學士趙鼎范冲並還合得恩數庚寅以生日爲會慶
節追冊故妃郭氏爲皇后九月甲午以子愔爲少保永
興軍節度使進封鄧王愷爲威武軍節度使開府儀同
三司進封慶王惇爲鎮洮軍節度使開府儀同三司進
封恭王甲午金人攻德順軍東山堡中軍將李彥戰死
丁酉詔開講日召輔臣觀講川陝宣諭使虞允文以論
邊事不合罷己亥詔侍從臺諫舉知四川利害可爲都
轉運使者庚子以金人來索舊禮詔宰執侍從臺諫各
陳應敵定論以聞辛丑詔吳璘審度措置保全川蜀乙
巳詔纂錄勳臣名次丙午轉補朱震范冲子孫官庚戌
諡皇后郭氏曰恭懷辛亥振淮東義兵及歸正人以總
領四川財賦軍馬錢糧王之望爲戶部侍郎川陝宣諭
使仍命將調兵同防守興州川口乙卯詔虞允文赴吳
璘軍議事辛酉以吳璘爲少師冬十月丙寅詔朝臣舉

堪監司郡守者戊辰以岳陽軍節度使居廣開府儀同
三司史浩兼權知樞密院事己巳葉義問罷詔登聞鼓
院毋沮抑進狀庚午以恩平郡王璩爲少保詔會慶節
權免上壽戊寅詔張浚陳俊卿覆實諸將所陳功賞改
謚皇后郭氏曰安穆壬午官岳飛孫六人甲申契丹招
討蕭鷓巴來奔金人攻德順城吳玠擊走之復遣兵追
襲遂爲所敗乙酉升建州爲建寧府戊子以資政殿學
士張燾同知樞密院事己丑安南都護南平王李天祚
闍婆國王悉里地茶蘭固野占城國王鄒時巴蘭並加
食邑實封十一月庚子以蕭鷓巴爲忠州團練使乙巳
金人攻水洛城丙午賜忠義軍統制皇甫偁軍帛五千
匹綿萬兩戊申詔改明年爲隆興元年辛亥免楊存中
所獻酒坊逋負錢四十萬緡甲寅定內侍官額辛酉史
浩免權知樞密院事裁定文武臣宮觀嶽廟員數立措
置京西營田司十二月乙丑詔宰臣復兼樞密使金人
攻隴城縣官軍拒却之丙寅詔帥臣監司具部內知州
治行臧否以聞詔棄德順城徙兵民于秦州以裏屯住
丁卯以陳康伯兼樞密使令江淮宣撫司增招武勇效
用軍戊辰詔侍從臺諫集議當今弊事仍命盡率其屬
使極言無隱辛未劉琪張說還自盱眙戊寅蠲四川赦

前登帶白契稅錢丙戌詔觀察使已上各舉所知三人
三省樞密院詳議立格以聞庚寅罷建康鎮江營田官
兵辛卯廣西賊王宣破藤州守臣廖顛棄城遁是歲諸
路斷大辟四十一人

隆興元年春正月壬辰朔羣臣朝于文德殿帝朝德壽
宮立武臣薦舉格甲午四川宣撫司奉詔班師庚子以
史浩爲尚書右僕射同中書門下平章事兼樞密使張
浚進樞密使都督江淮東西路軍馬丙午誅殿前司後
軍謀變者戊申詔禮部貢院試額增一百人丁巳詔吳
璘軍進退可從便宜璘已棄德順道爲金人所邀將士

死者數萬計二月壬戌朔用史浩策以布衣李信爲兵
部員外郎齎蠟書間道往中原招豪傑之據有州郡者
許以封王世襲安慶軍節度使士錢乞減奉賜之半以
助軍用自是諸宗室有請悉從之戊辰宰執陳康伯等
乞再減奉止存舊格之半許之己卯振兩淮流民及山
東歸正忠義軍癸未黃祖舜罷庚寅逐秦檜黨人仍禁
輒至行在三月壬辰朔金右副元帥紇石烈志寧以書
取侵地癸巳以張燾爲參知政事御史中丞辛次膺同
知樞密院事葉義問落端明殿學士饒州居住丙申雨
雹丁酉詔戶部置局議節浮費己亥楊存中等乞減半

奉如宰執例許之庚子以龍大淵知閣門事曾覲同知
閣門事壬寅陳康伯上欽宗陵名曰永獻乙巳詔求遺
逸丁未詔脩太上皇帝聖政罷龍大淵別與差遣曾覲
復帶御器械召張浚己酉張燾罷立選人減舉主法甲
寅復以龍大淵知閣門事曾覲同知閣門事給事申中
書舍人留黃不行乙卯詔飭郡縣吏庚申以久雨命有
司振災傷察刑禁夏四月乙丑定選人改官歲額戊辰
張浚入見議出師渡淮三省樞密院不預聞壬申賜禮
部進士李待問以下五百三十八人及第出身乙亥王
之望罷壬午詔戶部專議節浮費癸未詔以白金二
十五萬兩給江淮都督府軍費戊子張浚命邵宏淵帥
師次盱眙乙丑又命李顯忠帥師次定遠是月金人拔
環州守臣強寬及其弟震死之五月壬申申嚴鋪翠銷
金及神祠僭擬之禁丁酉李顯忠復靈壁縣邵宏淵次
虹縣金人拒之戊戌顯忠東趨虹縣庚子復虹縣金知
泗州蒲察徒穆及同知泗州大周仁降辛丑命左右史
日更立前殿壬寅張浚渡江視師癸卯金右翼軍都統
蕭琦降于李顯忠甲辰顯忠及宏淵敗金人于宿州乙
巳史浩罷追復司馬康右諫議大夫丙午復宿州戮金
兵數千人建康前軍統領官王琪巷戰死之丁未以辛

次膺爲參知政事翰林學士承旨洪遵同知樞密院事
督諸路開營田辛亥詣德壽宮賀天申節金紇石烈士
寧自睢陽引兵至宿州李顯忠擊郤之壬子欽宗大祥
帝服衰服詣几筵易祥服行祥祭禮顯忠與金人戰于
宿州邵宏淵不援顯忠失利是夜建康中軍統制周宏
及邵宏淵之子世雄殿前司統制官左士淵逃歸癸丑
進李顯忠開府儀同三司淮南京畿京東河北招討使
邵宏淵檢校少保寧遠軍節度使招討副使金人攻宿
州城顯忠大敗之殿前司統制官張訓通等七人統領
官十二人以二將不叶而遁甲寅李顯忠邵宏淵軍大
潰于符離乙卯下詔親征丙辰召汪澈以張浚兼都督
荆襄軍馬李顯忠邵宏淵至濠州張浚以劉寶爲鎮江
諸軍都統制丁巳以蒲察徒穆大周仁蕭琦並爲節度
使徒穆大同軍周仁彰國軍琦威塞軍遣御前忠勇軍
赴都督府是月成都地震三六月庚申朔日有食之遣
內侍趣上淮東將士功賞癸亥汪澈罷張浚乞致仕且
請通好皆不許丁卯以觀文殿大學士湯思退爲醴泉
觀使兼侍讀戊辰召虞允文以兵部侍郎周葵爲參知
政事汪澈落資政殿學士台州居住庚午張浚自盱眙
還揚州辛未李顯忠罷軍職壬申以太傅同安郡王楊

存中爲御營使節制殿前司軍馬癸酉下詔罪已張浚
降授特進仍前樞密使江淮東西路宣撫使官屬各奪
二官邵宏淵降武義大夫職仍舊詔楊存中先詣建康
措置營砦檢視沿江守備戊寅詔展巡幸之期辛次膺
罷已卯李顯忠責授清遠軍節度副使筠州安置辛巳
命浙西副都總管李寶兼御營統制官措置浙西海道
甲申右諫議大夫王大寶入對論移蹕以敷文閣學士
虞允文爲兵部尚書兼湖北京西宣諭使戊子放宮人
三十人以蕭琦爲檢校少保河北招撫使秋七月庚寅
朔以虞允文爲湖北京西制置使癸巳以湯思退爲尚

書右僕射同中書門下平章事兼樞密使李顯忠再責
授果州圍練副使潭州安置乙未詔宿州棄軍將佐奪
官貶竄有差丙申太白晝見經天罷江淮宣撫司便宜
行事乙巳以旱蝗星變詔侍從臺諫兩省官條上時政
闕失丁未詔徵李顯忠侵欺官錢金銀免籍其家乙卯
裁減省部寺監官吏戊午給還岳飛田宅八月丙寅張
浚復都督江淮軍馬庚午以劉寶兼淮東招撫使丙子
以飛蝗風水爲災避殿減膳罷借諸路職田之令戊寅
金紇石烈志寧又以書求海泗唐鄧四州地及歲幣癸
未復以龍大淵知閣門事曾覲同知閣門事丙戌遣淮

西安撫司幹辦公事盧仲賢等齎書至金帥府戒勿許
四州差減歲幣仍命諸將毋遣兵人出境九月己酉楊
存中罷冬十月戊午朔大臣奏金帥書言四事帝曰四
州地歲幣可與名分歸正人不可從辛酉御殿復膳已
已遣護聖軍戍江南丙子詔太上皇后教旨改稱聖旨
立賢妃夏氏爲皇后丁丑地震辛巳升洪州爲隆興府
詔江淮軍馬調發應援從都督府取旨餘事悉以聞十
一月己丑盧仲賢自宿州以金都元帥僕散忠義遺三
省樞密院書來庚子遣王之望等爲金國通問使辛丑
詔侍從臺諫於後省集議講和遣使禮數土貢四事仍
各薦可備小使者丙午盧仲賢擅許四州下大理寺奪
三官召張浚癸丑以胡昉楊由義爲使金通問國信所
審議官十二月己未陳康伯罷乙丑張浚入見丁丑以
湯思退爲尚書左僕射張浚爲右僕射並同中書門下
平章事兼樞密使浚仍都督江淮東西路軍馬壬午西
南方有白氣是歲以兩浙大水旱蝗江東大水悉蠲其
租

二年春正月辛卯詔增德壽宮車輦儀衛壬辰御文德
殿冊皇后癸巳脩三省法乙未及皇后朝德壽宮丙申
命虞允文調兵討廣西諸盜庚子罷諸州招軍丙午金

僕散忠義復以書來庚戌申嚴卿監郎官更出迭入之
制壬子振歸正人甲寅白氣亘天是月福建諸州地震
二月辛未蠲秀州貧民逋租壬申容州妖賊李雲作亂
癸酉復王權武義大夫命權廣西路都鈐轄專一措置
盜賊丙子詔飭將帥減文武官及百司吏郊賜之半罷
兩浙福建江西湖南夔州路參議官丁丑雨雹及雪獲
李雲其黨悉平乙酉胡昉自宿州還初金帥以昉等不
許四郡械擊之昉等不屈金主命歸之三月丙戌朔詔
張浚視師于淮又詔王之望等以幣還丁亥詔荆襄川
陝帥臣嚴邊備毋先事妄舉盧仲賢除名械送郴州編

管壬寅詔知光州皇甫侗毋招納歸正人丙午王宣等
降詔三衙戍兵歸司建康鎮江大軍更番歸省庚戌芝
生德壽宮以戶部侍郎錢端禮爲淮東宣諭使吏部侍
郎王之望爲淮西宣諭使詔撫諭兩淮軍民壬子以廣
西賊平詔減高藤雷容四州雜犯死罪囚釋杖以下蠲
夏秋稅賦以忠勇軍隸步軍司神勁右軍隸鎮江都統
司癸丑以王彥爲建康諸軍都統制兼淮西招撫使夏
四月庚申召張浚還朝甲子以李顯忠侵欺官錢給還
諸軍丁卯以建康歸正人爲忠毅軍鎮江爲忠順軍命
蕭琦蕭鷓巴分領之戊辰罷江淮都督府高麗入貢丁

丑張浚罷祭未言者論宰相執政徇欺之弊命書寘政
事堂五月壬辰復置環衛官丙申詔吳璘毋招納歸正
人辛丑詔劉寶量度泗州輕重取舍事宜以聞江西總
管邵宏淵責授靖州團練副使南安軍安置仍徵其盜
用庫錢乙巳率郡臣詣德壽宮賀天申節始用樂丁未
蝗詔內外賍私不法官吏尚書省置籍檢勘庚戌罷招
神勁效用軍辛亥鬻兩淮所招戶馬六月甲寅朔日有
食之辛酉以淫雨詔州縣理滯囚戊辰太白晝見壬申
命虞允文棄唐鄧允文不奉詔丁丑賑江東兩淮被水
貧民秋七月乙酉召虞允文以戶部尚書韓仲通爲湖
北京西制置使丁亥洪遵罷己丑以周葵兼權知樞密
院事遣主管馬軍司公事張守忠以兵詣淮西措置邊
備庚子太白經天詔内外文武官年七十不請致仕者
遇郊毋得蔭補己巳命海泗州徹戍丁未雨雹戊申蠲
淮東內庫坊場錢一年庚戌洪遵落端明殿學士癸丑
以江東浙西大水詔侍從臺諫卿監郎官館職陳闕失
及當今急務是月罷內侍押班梁珂爲在外宮觀移廣
西提刑司于容州八月甲寅朔以災異避殿減膳戊午
南丹州莫延廩爲諸蠻所逐來歸詔補脩武郎命江東
浙西守臣措置開決圍田甲子秦國大長公主薨以久

雨決繫囚庚辰以資政殿大學士賀允中爲知樞密院
事兼參知政事辛巳詔振淮東被水州縣張浚薨壬午
遣魏杞等爲金國通問使九月甲申罷內侍李珂賜諡
甲午詔江東浙西監司守臣講明措置田事乙未交趾
入貢丁酉嚴賊吏法辛丑以王之望爲參知政事權刑
部侍郎吳芾爲給事中兼淮西宣諭使金人犯邊以久
雨出內庫白金四十萬兩糴米賑貧民壬寅王彥帥師
濟江軍昭關癸卯命湯思退都督江淮東西路軍馬辭
不行乙巳復命楊存中爲同都督錢端禮吳芾並爲都
督府參贊軍事罷宣諭司仍易國書以付魏杞少保崇

信軍節度使趙密落致仕權領殿前司職事冬十月甲
寅魏杞至盱眙金帥以國書未如式弗受欲得商秦地
及俘獲人且邀歲幣三十萬杞未得進丁卯賀允中罷
爲資政殿大學士致仕己巳以周葵兼權知樞密院事
王之望兼同知樞密院事庚午詔輔臣夕對便殿丙子
大風庚辰蠲京西湖北運糧所經州縣秋稅之半以靖
海軍節度使李寶爲沿海駐劄御前水軍都統制辛巳
金人分道渡淮劉寶棄楚州遁十一月乙酉知楚州魏
勝與金人戰死之州遂陷濠州亦陷王彥棄昭關遁滁
州又陷丙戌詔諭沿邊將士丁亥詔魏杞等以所賫禮

幣犒軍杞弗從命留鎮江候旨復命王之望督視江淮
軍馬戊子以金人侵擾詔郊祀改用明年又詔諭歸正
官民軍士命王之望同都督江淮軍馬湯思退罷都督
召陳康伯己丑王之望罷同都督庚寅命楊存中都督
江淮軍馬辛卯湯思退罷尋以尹穡晁公武論之落觀
文殿大學士永州居住未至而卒甲午以黃榜禁太學
生伏闕是日太學生張觀等七十二人上書請斬湯思
退王之望尹穡竄其黨洪适晁公武而用陳康伯胡銓
等以濟大計丙申遣國信所大通事王抃持周葵書如
金帥府請正皇帝號爲叔姪之國易歲貢爲歲幣減十

萬曆二十七年刊
與同以金人犯淮南詔避殿減膳丁酉詔擇日視師戊
戌以少保觀文殿大學士陳康伯爲尚書左僕射同中
書門下平章事兼樞密使庚子遣兵部侍郎胡銓右諫
議大夫尹穡分詣兩浙措置海道贈魏勝寧國軍節度
使諡忠壯辛丑兵部尚書錢端禮賜出身簽書樞密院
事兼提領德壽宮壬寅詔侍從兩省官日一至都堂議
事有關臺諫者亦聽會議以顯謨閣學士虞允文同簽
書樞密院事癸卯遣王之望勞師江上甲辰金人犯六
合縣步軍司統制崔阜擊却之乙巳以錢端禮兼權參

知政事丁未以顯謨閣直學士沈介爲沿江制置使命沿江諸州調保甲分守渡口己酉劉寶落節鉞爲武泰軍承宣使王彥落龍神衛四廂都指揮使閏月甲寅陳康伯入見詔康伯間日一朝肩輿至殿門給扶升殿丙辰周葵罷王朴見金二帥皆得其報書以歸戊午蕭琦卒壬戌詔罷胡銓尹穡丙寅召韓仲通以沈介爲兵部尚書湖北京西制置使戊辰以金人且退詔督府擇利擊之王之望執不可乙亥之望罷丙子以王抃爲奉使金國通問國信所參議官持陳康伯報書以行丁丑金遣張恭愈來迓使者詔臺諫侍從兩省官舉楚廬滁濠四州守臣十二月甲申罷陝西路轉運司戊子魏杞始渡淮詔郊祀大禮遵至道典故改用來年正月一日上辛辛卯以錢端禮爲參知政事兼知樞密院事虞允文同知樞密院事兼權參知政事禮部尚書王剛中簽書樞密院事丙申制曰比遣王抃遠抵穎濱得其要約尋澶淵盟誓之信倣大遼書題之儀正皇帝之稱爲叔姪之國歲幣減十萬之數地界如紹興之時憐彼此之無辜約叛亡之不遣可使歸正之士咸起寧居之心重念數州之民懼此一時之難老穉有蕩析之裁丁壯有係累之苦宜推蕩滌之宥少慰彫殘之情應沿邊被兵州

軍除逃遁官吏不赦外雜犯死罪情輕者減一等餘並放遣遣洪适等賀金主生辰詔吳挺市馬赴行在己亥雨雹壬寅罷三衙江上荆襄諸軍招軍甲辰遣沿海水軍還屯己酉朝獻景靈宮庚戌朝饗太廟

乾道元年春正月辛亥朔合祀天地于圓丘大赦改元丁巳淮西安撫韓璉勒停賀州編管庚申以錢端禮兼德壽宮使辛酉召楊存中通問使魏杞至燕山丁卯以王抃使金有勞進五官庚午西北方有白氣詔館職更迭補外辛未立兩淮守令勸民種桑賞壬申詔兩浙振流民以紹興流民多死罷守臣徐壽及兩縣令癸酉蠲

沿邊殘破州軍官賦一年甲戌劉寶責果州團練副使

瓊州安置乙亥罷兩淮招撫司及陝西河東宣撫招討司丙子淮西守將孔福以遇敵棄城伏誅頓遇奪官刺面配吉陽軍牢城二月庚辰朔朝德壽宮從太上皇太上皇后幸四聖觀乙酉罷江淮都督府遣官檢察兩淮州縣振濟饑民庚寅雨雹癸巳移濠州戍兵于藕塘庚子以楊存中爲寧遠昭慶軍節度使甲辰以久雨避殿減膳蠲兩淮災傷州縣身丁錢絹決繫囚丁未陳康伯薨諡文恭三月甲寅太白晝見己未御殿復膳庚申以虞允文爲參知政事兼同知樞密院事王剛中同知樞

密院事命淮西湖北荆襄帥臣措置屯田復置榷場癸亥黃祖舜薨戊辰白氣直天己巳罷諸軍額外制領將佐乙亥太白經天是春湖南盜起入廣東焚掠州縣官軍討平之夏四月庚子金報問使完顏仲等入見乙巳吳璘入見五月庚戌以璘爲太傅封新安郡王丙辰詔有司治皇后家廟壬戌詔監司帥守講究弊事以聞合廣南東西路監事爲一司癸亥詔總領帥漕臣諸軍都統制並兼提領措置屯田沿邊守臣兼管屯田事丁卯詔吳璘措置馬綱水路壬申蠲四川州縣虛額錢吳璘改判興元府乙亥詔未銓試人毋得堂除丙子遣李若川等使金賀上尊號增置諸路鈐轄都監郴州盜李金等復作亂遣兵討捕之六月癸未王剛中薨乙酉詔恭王府直講王淮傾邪不正有違禮經可與外任丙戌以翰林學士洪适簽書樞密院事戊子步軍司統制官崔臯坐奏功冒濫奪所遷觀察使止進橫行三官令本軍自效辛卯以武經郎令德爲安定郡王壬辰以淮南轉運判官姚岳言境內飛蝗自死奪一官罷之丙申以兩淮守令勞徠安集無效下詔戒飭之仍以詔置守令治所壬寅蠲廣東殘破郡縣稅賦甲辰罷湖北京西制置司秋七月辛亥詔知州年七十以上者與宮觀癸丑輔

臣晚對選德殿御坐後有大屏記注諸道監司郡守姓名因令都堂視此書之甲寅借職田租二年以裨經費己未鑄當二錢己巳蠲關外四州民今年租稅及湖南賊蹂郡縣夏稅八月己卯以永豐圩田賜建康都統司癸未獲李金乙酉詔立子愔爲皇太子丁亥虞允文罷戊子大赦己丑以洪适爲參知政事兼權知樞密院事吏部侍郎葉顥簽書樞密院事兼權參知政事庚寅立知州軍諸路總管鈐轄都監辭見法癸巳錢端禮以避東宮親嫌罷爲資政殿大學士提舉萬壽觀戊戌吏部侍郎章服以論虞允文阿附罷謫居汀州九月乙卯立

黃國夫人錢氏爲皇太子妃丁巳申嚴百司官出入局之制丁卯升鼎州爲常德府甲戌以端明殿學士汪澈知樞密院事洪适兼同知樞密院事乙亥置沿淮諸州都巡檢冬十月己卯遣方慈等使金賀正旦戊子增頭子錢歸正人右通直郎劉蘊古坐以軍器法式送北境伏誅壬辰御大慶殿冊皇太子癸巳詣德壽宮稱謝乙未詔侍從各舉所知宗室一二人丁酉金遣高衍等來賀會慶節乙巳淮北紅巾賊踰淮劫掠立賞討捕之己而知楚州胡明遣巡尉擊殺其首蕭榮十一月辛亥招收兩淮流散忠義人丙寅白氣且天辛未遣龍大淵撫

諭兩淮措置屯田督捕盜賊十二月戊寅以洪适爲尚書右僕射同中書門下平章事兼樞密使汪澈爲樞密使命廣東提刑司招安李金餘黨癸未遣王曠等賀金主生辰庚寅以葉顥爲參知政事兼同知樞密院事辛卯詔侍從臺諫兩省舉堪監司郡守者各一人三衙知閤舉材武可守邊者一人庚子罷兩淮諸州權攝官壬寅金遣烏古論忠弼等來賀明年正旦癸卯詔樞密院文書依三省式經中書門下畫黃書讀至正二年春正月辛酉省六合戍兵以所墾田給還復業之民辛未命湖南監司存恤寇盜殘破郡縣二月丁丑罷盱眙屯田

振兩浙江東饑戊寅辛玉津園宴射遂幸龍井三月乙巳禁京西利州路科役保勝義士壬子詔戒飭刑獄官戊午殿中侍御史王伯庠請裁定奏薦詔三省臺諫集議具條式以聞詔縣令非兩任毋除監察御史非任守臣毋除郎官著爲令丁卯賜禮部進士蕭國梁以下四百九十有三人及第出身戊辰再增諸州軍離軍添差員闕辛未罷洪适右僕射癸酉以給事中權吏部尚書魏杞同知樞密院事兼權參知政事丁丑罷和羅夏四月戊寅以久雨命侍從臺諫議刑政所宜以聞減大理三衙臨安府及浙西州縣雜犯死罪以下囚一等釋桂

以下庚辰詔兩浙漕臣王炎開平江湖秀圍田辛巳避
殿減膳甲申太白晝見癸巳御殿復膳乙未汪澈罷丁
酉以知荆南府李道憑恃戚里妄作罷之五月戊申張
壽薨巳酉罷權借職田庚戌葉顥罷以魏杞爲參知政
事右諫議大夫林安宅同知樞密院事兼權參知政事
中書舍人蔣芾簽書樞密院事癸丑太白晝見經天禁
浙西脩築圍田罷脩建康行宮丁卯命監司守臣預備
水旱六月甲戌罷兩浙路提舉市舶司詔諸路監司帥
臣各察守令臧否以聞丙子刑部上乾道新編特旨斷
例戊寅詔制科權罷注疏出題守臣監司亦許解送庚

辰封孫挺爲福州觀察使榮國公攄爲左千牛衛大將
軍癸未詔使相母奏補文資七色補官人母任子堂吏
遷朝議大夫以五員爲額乙酉申嚴內外牒式法裁其
額丙戌廢永豐圩戊戌詔改官入實歷知縣一任方許
關升著爲定式秋七月巳酉調泉州左翼軍二千人屯
許浦鎮甲寅以鎮江都統制戚方爲武當軍節度使八
月辛未朔詔兩淮行鐵錢銅錢母過江北癸酉以武鋒
軍隸步軍司甲戌罷任子年三十得免試參選之令丁
丑蠲淮南放歸萬弩手差役二年壬午詔諸州守臣兼
訓練禁軍癸未降會子交子于鎮江建康務場令江淮

之人對換丙戌林安宅劾葉顥之子受金失實罷之丁亥詔安宅筠州居住溫州大水戊子以魏杞兼同知樞密院事蔣芾權參知政事召葉顥庚寅少保新興郡王吳蓋薨甲午立中興以來十三處戰功格目乙未詔吳璘復判興州丙申升宣州爲寧國府罷戶部諸路歲糴一年九月甲辰知上元縣李允升犯贓貸死杖脊刺面配惠州牢城籍其貲丙午建康守臣王佐坐縱允升去官奪三官勒停建昌軍居住餘失按官吏及薦舉官奪官有差辛亥遣官按視溫州水災振貧民決繫囚乙卯詔改造大曆辛酉追封子恪爲邵王諡曰悼肅甲子詔監司各舉部內知縣縣令二三人守臣各舉屬縣一二人已巳魏杞等上神宗哲宗徽宗三朝帝紀太上皇聖政太白晝見是月詔舉將帥置章奏簿冬十月癸酉上太上皇聖政于德壽宮乙亥遣薛良朋等使金賀正旦已卯減饒州歲貢金三之一蠲諸路酒坊逋賦戊子知峽州呂令問坐縱贓吏知夷陵縣韓贄胄去官奪二官鄂州居住辛卯雨雹金遣魏子平等來賀會慶節十一月丙午楊存中薨已酉盡出內藏及南庫銀以易會子官司並以錢銀支遣民間從便兩淮總領所許自造會子鬻諸路管田壬子詔脩祥曦殿記注乙卯密詔四川

制置使汪應辰如吳璘不起收其宣撫使牌印權行主
管職事甲子大閱戊辰築郢州城是月詔汰冗兵十二
月庚午朔白氣亘天祭酉詔三省待從臺諫兩淮漕臣
郡守條具兩淮鐵錢交子利害以聞乙亥遣梁克家等
賀金主生辰己卯以資政殿學士葉顥知樞密院事辛
巳詔免進呈欽宗日曆送國史院脩纂實錄壬午追封
楊存中爲和王甲申以葉顥爲尚書左僕射魏杞右僕
射並同中書門下平章事兼樞密使蔣芾參知政事吏
部尚書陳俊卿同知樞密院事兼權參知政事庚寅詔
宰相領兼制國用使參知政事同知國用事癸巳詔監
司守臣舉廉吏丙申金遣烏古論元忠等來賀明年正
旦以江東兵馬鈐轄王抃爲帶御器械是歲裁定內外
軍額

Blank columns for text on the right page.

宋史卷三十三終

宋史卷三十四

本紀第三十四

開府儀同三司上柱國錄軍國重事右丞相監修國史領經筵事都總裁脫脫等脩
皇明朝列大夫國子監祭酒臣方從哲

承憲鄭君春坊右中允管國子監司業事 臣黃汝良等奉

勅重校刊

孝宗二

三年春正月甲辰詔廷尉大理官母以獄情白宰執探
刺旨意為輕重庚戌置三省戶房國用司初以國用匱
乏罷江州屯姓軍馬至是復留之癸亥罷銅錢過江之
禁裁定利州西路諸軍額二月壬申詔國用司月上宮

華曆一十七年刊

宋史卷三十四

本紀

禁及百司官吏三衙將士請給之數癸酉出龍大淵爲
江東總管曾覲爲准西總管甲戌大淵改浙東覲改福
建乙亥罷成都潼州路轉運司輪年銓試以其事付制
置司辛巳以端明殿學士虞允文知樞密院事癸未雨
雹甲申爲知陳州陳亨祖立廟于光州賜名愨忠丙戌
以武經龜鑑孫子賜鎮江都統戚方建康都統劉源癸
巳措置淮東山水砦丙申從太上皇太上皇后幸玉津
園戊戌直秘閣前廣東提刑石敦義犯賊刺面配柳州
籍其家五月甲辰從太上皇太上皇后幸聚景園辛亥
詣德壽宮恭請裁定醫官員額丁巳詔四川宣撫司創

當是潤字

招千人置司所在屯駐壬戌伯母秀王夫人張氏薨夏
四月辛未觸諸路州軍逋負癸酉爲秀王王夫人成服
于後苑百官進名奉慰丁丑合利州東西路爲一戊寅
以吳璘知興元府克利州路安撫使四川宣撫使五月
癸卯葉顥等上三祖下仙源積慶圖及太宗真宗玉牒
哲宗寶訓甲寅吳璘薨庚申命四川制置使汪應辰主
管宣撫司事移司利州脩揚州城壬戌大減三衙官屬
六月己巳命汪應辰權節制利州路屯駐御前軍馬辛
未復分利州東西路爲二甲戌以虞允文爲資政殿大
學士四川宣撫使乙亥金遣使來取被俘人詔實俘在民

間者還之軍中人及叛亡者不預戊寅復以虞允文爲
知樞密院事克宣撫使帝親書九事戒之罷淮西江東
總領所營田募人耕佃壯丁各還本屯癯老存留

請給甲申詔鎮江都統制戚方武鋒軍都統制陳敏各
上清河口戰守之策追封吳璘爲信王丁亥詔後省參
攷理檢院典故辛卯皇后夏氏崩振泉州水災秋七月
己亥立薦舉改官額壬寅以皇太子疾減雜犯死罪囚
釋流以下乙巳皇太子薨諡曰莊文己酉東宮醫官杜
揖除名昭州編管尋改瓊州閏月辛未詔諸軍復置副
都統制文字與都統制連書軍馬調發從都統制違者

奏劾戚方罷癸酉惟橫安恭皇后于臨安脩吉寺丁亥
戚方落節鉞信州居住八月丁酉內侍陳瑜李宗回坐
交結戚方受賂瑜除名決杖黥面配循州宗回除名筠
州編管方責授果州團練副使潭州安置籍所盜庫金
以犒軍甲寅以久雨命臨安府決繫囚丁巳葉顥等請
罷不許蠲光濠廬三州壽春府賦一年戊午遣官分決
滯獄壬戌以知建康府史正志兼沿江水軍制置使自
鹽官至鄂州沿江南北及沿海十五州水軍悉隸之癸
亥詔給舍討論考課舊法四川旱賜制置司度牒四百
備振濟九月戊子太白晝見冬十月乙未朔占城入貢

丁酉遣唐瑒等使金賀正旦戊戌脩真州城以嗣濮王
士輅爲開府儀同三司庚子定內外薦舉改官人歲額
癸卯詔歸正借補官資人克樞密院劾士於指定州軍
以官庫酒息贍之者毋罷其給乙卯金遣蒲察莎魯窩
等來賀會慶節十一月丙寅合祀天地于園丘大赦戊
辰雷已巳詔戒飭武臣及百官癸酉以郊祀雷葉顥魏
杞並罷命陳俊卿爲參知政事翰林學士劉珙同知樞
密院事甲戌蔣芾陳俊卿請罷不許丁丑以雷發非時
詔臺諫侍從兩省官指陳闕失辛巳詔侍從兩省臺諫
卿監郎官舉堪郎官寺監丞監司郡守者癸巳罷川路
馬船十二月丙申增脩六合城己亥遣王湔賀金主生
辰乙巳置豐儲倉增印會子辛亥以吳益爲太傅庚申
金遣徒單忠衛等來賀明年正旦是歲兩浙水四川旱
江東西湖南北路蝗振之

四年春正月戊辰籍荆南義勇民兵增給衣甲遇農隙
日番教壬午奪秦墳秦堪郊恩蔭補癸未雨雹甲申幸
天竺寺遂幸玉津園辛卯罷吳益郊恩蔭補壬辰葉顥
薨二月甲午朔罷福建路賣鈔鹽蠲轉運司歲發鈔鹽
錢十五萬緡詔四川宣撫使虞允文集四路漕臣會計
財賦所入對立兵額丁酉命湖北安撫司給田募辰沅

靖三州刀弩手戊戌置和州鑄錢監己亥以蔣芾爲尚
書右僕射同中書門下平章事兼樞密使兼制國用使
觀文殿大學士史浩爲四川制置使浩辭不行庚子詔
蔣芾常朝贊拜不名芾辭許之乙巳賜王炎出身簽書
樞密院事癸丑五星皆見乙卯雪雨雹三月庚午以敷
文閣待制晁公武爲四川安撫制置使戊寅詔贈果州
團練使韓崇岳立廟賜名忠勇宣州觀察使朱勇立廟
賜名忠節己丑四方霧下若塵庚寅蠲楚州壯丁社民
稅役謚陳享祖曰愍節夏四月乙未置漢陽軍收發馬
監詔官吏非犯公罪毋得引用併計案問發己亥置鄂
州轉般倉癸卯遣使撫卹蜀二州饑民爲亂者己酉追
封韓世忠爲斬王甲寅蔣芾等上欽宗帝紀實錄丙辰
禮部員外郎李燾上所著續通鑑長編自建隆至治平
一百八卷丁巳詔大使局參用新舊曆戊午詔販牛過
淮者論如興販軍須之罪是月振綿漢等州饑五月癸
亥出度牒千道續減四川科調乙丑太白晝見以邛州
安仁縣荒旱失于蠲放致饑民擾亂守貳縣令降罷追
停有差甲申謚趙鼎曰忠簡丙戌行乾道新曆丁亥以
饒信二州建寧府饑民嘯聚遣官措置振濟是月西夏
任敬德遣使至四川宣撫司約發兵攻西蕃六月辛卯

朔太白晝見經天甲午詔罷廣西鈔鹽復官般官賣法
歲減轉運司鈔錢十九萬緡其秋苗母得科折戊戌蠲
諸路逋負乾道元年二月和市折帛雜色錢辛丑龍大
淵卒詔以爲寧武軍節度使致仕五星皆見癸卯詔四
川宣撫司增印錢引一百萬對償民間預借錢蠲印蜀
二州夏稅丁巳召興化軍布衣林彖赴行在戊午蔣芾
以母喪去位秋七月壬戌以劉珙兼參知政事召建寧
府布衣魏掞之赴行在申禁異服異樂癸亥徽州大水
已巳罷沿江水軍制置司辛未衢州大水戊寅知衢州
王悅以盛暑禱雨蔬食減膳憂勤致疾而死贈直龍圖
閣丁亥以經總制餘剩錢二十一萬緡椿留印蜀州以
備振濟己丑以久雨御延和殿慮囚減臨安府三衙死
罪以下囚釋杖以下是月西夏遣間使來八月乙亥班
祈雨雪之法于諸路己亥五星皆見丁未主管殿前司
公事王琪傳旨不實擅興工役降三官放罷庚戌劉珙
罷辛亥陳俊卿請罷政不許九月庚申立內外將佐升
差審察法庚午從太上皇幸天竺寺限品官子孫名田
是秋罷關外四州營田官兵募民耕佃冬十月壬辰遣
鄭聞等使金賀正旦甲午禁歸正人藏匿金人者乙未
臣僚言天下之事必歷而後知試而後見爲縣令者必

爲丞簿爲郡守者必爲通判爲監司者必爲郡守皆有
等差自今職事官吏局務官必任滿方許求外未歷親
民任使卽未得擬州郡且授通判詔從之庚子蔣芾起
復尚書左僕射陳俊卿右僕射並同中書門下平章事
兼樞密使兼制國用使甲辰大閱巳酉金遣移刺神獨
幹等來賀會慶節庚戌大風十一月壬戌遣知無爲軍
徐子寅措置楚州官曰招集歸正忠義人以耕甲戌嚴
盜賊法乙亥詔峽州布衣郭雍赴行在壬申兩淮歸正
忠義有田產者蠲役五年癸未岳陽軍節度使居廣封
永陽郡王十二月丙申遣胡元質等賀金主生辰甲辰

賜魏掞之同進士出身爲太學錄蔣芾辭起復許之減

兩浙江東西路明年夏稅和市之半甲寅金遣完顏仲
仁等來賀明年正旦

五年春正月甲戌措置兩淮屯田二月巳丑詔申嚴太
廟季點法乙未命楚州兵馬鈐轄羊滋專一措置沿淮
海盜賊先是海州人時旺聚衆數千來請命旺尋爲金
人所獲其徒渡淮而南者甚衆故命滋彈壓之戊戌贈
張浚太師諡忠獻壬寅以給事中梁克家簽書樞密院
事癸卯大風甲辰以王炎參知政事兼同知樞密院事
丙午雨雹辛亥詔自今詔令未經兩省書讀者毋輒行

給舍駁正毋連銜同奏三月丁巳朔詔趣脩廬和二州
城已巳蠲成都府路民戶歲輸對糴米腳錢三十五萬
緡乙亥以王炎爲四川宣撫使仍參知政事召虞允文
赴行在丙子賜禮部進士鄭僑以下三百九十有二人
及第出身壬午賜郭雍號冲晦處士癸未罷科州路諸
州營田官兵募民耕佃詔侍從監司帥臣管軍薦武舉
出身人可將佐者夏四月己丑復置將作軍器少監壬
辰以梁克家兼參知政事辛丑詔福建路貧民生子官
給錢米庚戌脩襄陽府城辛亥振恤衢婺餽信四州流
民五月己巳帝以射弩弦斷傷目不視朝金牒取俘獲
人王抃議盡遣時旺餘黨陳俊卿持不可帝然之六月
庚寅太白晝見戊戌始視朝己酉以虞允文爲樞密使
秋七月乙丑召曾覲入見陳俊卿及虞允文請罷之不
許覲至行在俊卿允文復言其不可留詔以覲爲浙東
總管八月甲申朔日有食之己丑以陳俊卿爲尚書左
僕射虞允文爲尚書右僕射並同中書門下平章事兼
樞密使兼制國用使辛亥命淮西路鑄小鐵錢九月己
未罷淮東屯田官兵募民耕佃辛酉詔淮東諸州農隙
教閱民丁甲子詔侍從臺諫集議欽宗配饗功臣壬申
大風命淮西安撫司參議官許子中措置淮西山水砦

招集歸正忠義人耕墾官田冬十月乙酉遣汪大猷等使金賀正且戊子振溫台二州被水貧民以守臣監司失職降責有差戊戌大風己亥命饒信二州歲各留上供米三萬石以備振糶癸卯金遣高德基等來賀會慶節十一月癸丑朔復置淮東萬弩手名神勁軍庚申增置廣東水軍乙丑以孫擴爲右千牛衛大將軍以明州定海縣水軍爲御前水軍丙寅爲岳飛立廟于鄂州己巳太白晝見辛未詔侍從臺諫兩省官各舉歲朝官以上才堪監司郡守者三人壬申復成閔慶遠軍節度使鎮江諸軍都統制十二月己丑遣司馬伋等賀金主生

辰辛卯大風丁酉置應城縣馬監復李顯忠威武軍節度使乙巳復置成都府廣惠倉戊申金遣完顏毅等來賀明年正旦

六年春正月癸丑雅州沙平蠻寇邊焚礪門砦四川制置使晁公武調兵討之失利乙卯脩楚州城丁巳復強盜舊法其四年十一月指揮勿行癸亥初降金字牌下四川宣撫司備邊奏己丑增築豐儲倉庚午以奉國軍承宣使知廬州郭振爲武泰軍節度使二月乙酉詔戶部侍郎二人分領諸路財賦丁亥復置舒州同安監鑄鐵錢辛卯王炎遣人約沙平蠻歸部稍捐邊稅與之丙

申廣西路復行鈔鹽法仍增收通貨錢四十萬緡以備
漕計壬寅詔諭大臣均役法嚴限田抑游手務農桑已
酉置應城縣孳生監庚戌以曾覲爲福州觀察使遣司
農寺丞許子忠詣淮西措置鐵錢三月癸丑用三省官
兩淮守帥宜闕

二年後察其能否以行賞罰乙卯
裁減樞密院吏額一百十有四人丁巳詔步軍司權以
三萬五千人爲額以王林僉知閣門事專一措置三衙
揀選官兵贈彰國軍節度使大周仁爲太尉庚申從太
上皇太上皇后幸聚景園乙丑以晁公武王炎不協罷
四川制置司歸宣撫司辛未從太上皇太上皇后幸聚

景園甲戌裁減三省吏額七十人戊寅以知紹興府史
浩爲檢校少傅保寧軍節度使己卯詔兩淮州縣官以
繁簡易其任復置江浙荆湖兩廣福建等路都大發運
使以新知成都府史正志爲之夏四月辛巳朔罷鑄錢
司歸發運司併淮東總領所歸淮西總領所以敷文閣
直學士張震知成都府克本路安撫使乙未賜發運使
史正志緡錢二百萬爲均輸和糴之用吏部尚書汪應
辰三上疏論發運司戊戌以應辰知平江府五月甲寅
裁減六部吏額百五十人其餘百司三衙以是爲差已
未陳俊卿虞允文等上神宗哲宗徽宗欽宗四朝會要

太上皇王牒已巳陳俊卿以議遣使不合罷爲觀文殿
大學士知福州罷行在至鎮江征所比近者十有三
甲戌詔減飾百官丁丑知潮州曾造犯贓貸命南雄州
編管籍其家戊寅詔給舍臺諫言事閏月壬午詔監司
帥臣舉守令贓否失實依舉清要官法定罪甲申卽給
諸州上供綱目季申而歲校之以爲殿最戊子遣范成
太等使金求陵寢地且請更定受書禮辛卯吏部侍郎
陳良祐論祈請使不當遣恐生邊釁詔以良祐妄與異
論不忠不孝放罷送筠州居住癸巳增環衛官奉以梁
克家爲參知政事兼同知樞密院事壬寅以江東漕臣
黃石不親按行水災州郡降二官甲辰辛亥膺薨戊申
復置武臣提刑六月壬子申嚴卿監郎官更迭補外之
癸壬申增武學生爲百人癸酉置蘄州蘄春監黃州齊
安監鑄鐵錢是月榮國公挺自東宮出居外第秋七月
癸未詔以沙田蘆場歲收租稅六十餘萬緡入左藏南
庫丙戌詔川廣監司郡守任滿奏事訖方調己丑置興
國軍興國監甲午詔除郎官並引對畢供職辛丑復置
御前弓馬子弟所命吳挺兼提舉賜岳飛廟曰忠烈八
月庚戌虞允文請蚤建太子癸丑復置詳定一司勅令
所丙寅置閣門舍人十員是月虞允文上乾道勅令格

式九月壬辰賜蘇軾諡曰文忠辛丑沅州徭人相讐殺
守臣孫叔傑出兵擊之失利徭人進迫州城安撫司諭
解之叔傑尋抵罪是月范成大至自金許以遷奉及
歸欽廟梓宮而不易受書禮冬十月己酉以孫攄爲左
千牛衛大將軍丙辰詔發運使置司行在諭司馬朴曰
忠潔辛酉遣呂正己等使金賀正旦丁卯金遣耶律子
敬等來賀會慶節甲戌起居舍人趙雄請置局議恢復
詔以雄爲中書舍人十一月丁丑朔置軍器監一員
壬午合祀天地于圜丘大赦乙未復置神武中軍以吳
挺爲都統制召曾覲提舉佑神觀丁酉加上光堯壽聖

太上皇帝尊號曰光堯壽聖憲天體道太上皇帝壽聖
太上皇后尊號曰壽聖明慈太上皇后是月遣趙雄等
賀金主生辰別函書請更受書之禮置左藏南上庫十
二月戊申大閱甲子置江州廣寧監臨江軍豐餘監撫
州裕國監鑄鐵錢壬申金遣蒲察愿等來賀明年正旦
癸酉罷發運司以史正志奏課不實責爲楚州團練副
使永州安置是歲兩浙江東西福建水旱

七年春正月丙子率羣臣奉上太上皇太上皇后冊寶
于德壽宮庚辰虞允文復請建太子帝命允文擬詔以
進壬寅命三省旬錄宣諭聖語及時政記同進是月復

鑄錢司二月癸丑詔立子惇爲皇太子大赦以慶王愷
爲雄武保寧軍節度使判寧國府進封魏王丁巳增置
皇太子宮講讀官庚申罷會子庫仍賜戶部內藏南庫
緡錢二百萬銀九十萬兩以增給官兵之奉甲子詔寺
觀母免稅役丁卯太傅大寧郡王吳益薨壬申大風三
月乙亥朔趙雄至金金拒其請詔訓習水軍丙子立恭
王夫人李氏爲皇太子妃戊寅徒侍衛馬軍司戊建康
已卯起復劉珙同知樞密院事以明州觀察使知閣門
事兼樞密都承旨張說簽書樞密院事左司員外郎兼
侍講張斌言說不宜執政乙酉立沿海州軍私齎銅錢
下海船法丙戌復置將作監殿中侍御史李處全乞遣
張說按行邊戌以息衆論中書舍人范成大乞不草詞
戊子說罷爲安慶軍節度使提舉萬壽觀庚寅遣使覈
兩淮種麥丙申御大慶殿冊皇太子禮部侍郎鄭聞工
部侍郎胡銓樞密院檢詳文字李衡秘書丞潘慈明並
罷虞允文乞留銓乃以爲寶文閣待制兼侍講己亥皇
太子謝于紫宸殿宰相率百官赴東宮賀夏四月戊申
以曾覲爲安德軍承宣使庚申詔諸路增收無額錢物
並輸南上庫壬戌從太上皇太上皇后幸聚景園甲子
詔皇太子判臨安府己巳詔侍從臺諫兩省官舉任刑

獄錢穀及有智略吏能者各二人辛未詔皇太子領臨
安尹五月戊寅復置淮東總領所丁亥劉珙起復同知
樞密院事爲荆襄宣撫使珙辭不拜庚寅金人葬欽宗
于鞏原丁酉詔廣西帥臣措置南丹州市馬是月遣知
閣門事王朴點閱荆襄軍馬六月丙午復主管馬軍司
公事李顯忠爲太尉己巳賜吳璘諡曰武順壬申詔兩
淮墾田毋創增稅賦秋七月庚子以王炎爲樞密使四
川宣撫使八月丙辰詔兩淮民丁克民兵者本名丁錢
勿輸辛酉復脩襄陽城九月壬申朔以江西湖南旱命
募民爲兵甲申從太上皇太上皇后幸東園戊子安定
郡王令德薨冬十月丁未罷紹興宗正行司改恩平郡
王璩判西外宗正己酉遣莫濛等使金賀正旦壬戌金
遣烏林答天錫等來賀會慶節天錫要帝降榻問金主
起居虞允文請帝還內僉知閣門事王朴諭天錫以明
日見天錫沮退癸亥會慶節金使隨班入見十一月甲
戌御集英殿策試應賢良方正能直言極諫科李廔戊
寅錫廔制科出身十二月丁未遣翟紱等賀金主生辰
庚申詔閣門舍人依文臣館閣以次輪對癸亥罷太醫
局丙寅金遣完顏宗寧等來賀明年正旦是歲湖南江
東西路旱振之

八年春正月庚午朔班乾道勅令格式丁酉朝獻景靈宮遂幸天竺寺王津園二月乙巳詔改尚書左右僕射同中書門下平章事爲左右丞相丙午詔六察分隸事有違戾許監察御史隨事具實狀糾劾以聞戊申遣姚憲等使金賀上尊號附請受書之事辛亥以虞允文爲左丞相梁克家爲右丞相並兼樞密使癸丑以安慶軍節度使張說吏部侍郎王之奇並簽書樞密院事侍御史李衡右正言王希呂交章論說不可爲執政不報禮部侍郎兼直學士院周必大不草答詔權給事中莫濟封還錄黃詔並與在外宮觀丙辰詔罷王希呂與遠小

監當尋詔與宮觀既丁巳李衡罷爲起居郎丙寅戶部尚書曾懷賜出身參知政事三月戊子詔省侍中中尚書書令員以左右丞相克其位夏四月庚子賜禮部進士黃定以下三百八十有九人及第出身己酉殿中侍御史蕭之敏劾虞允文擅權不公允文請罷政許之翼日復留出之敏提點江東刑獄甲子措置兩淮官田徐子寅等坐授田歸正人逃亡奪官有差乙丑詔再蠲兩淮二稅一年五月戊子福建鹽行鈔法丙申立宗室銓試法六月庚子以武德郎令擅爲金州觀察使封安定郡王壬寅蠲兩淮歸正人撮收課子淮東巡尉有縱逸歸

正戶口過淮者奪官有差壬子省監司薦舉員秋七月
辛巳罷淮西屯田官兵募歸正人耕佃姚憲曾覲至自
金金人拒其請癸未以覲為武恭軍節度使壬辰雨雹
九月戊辰定江西四監鐵錢額乙亥詔王炎赴都堂治
事戊寅以虞允文為少保武安軍節度使四川宣撫使
封雍國公己丑賜允文家廟祭器壬辰允文入辭帝諭
以決策親征令允文治兵俟報冬十月丁未遣馮樽等
使金賀正且丙辰金遣夾谷清臣等來賀會慶節罷借
諸路贖田十一月辛未遣官鬻江浙福建二廣湖南八
路官田辛巳復四川諸州教授田庚寅進檢校少傅知
福州史浩開府儀同三司十二月戊戌蠲兩淮明年租

賦甲辰詔京西招集歸正人授田如兩淮甲寅四川試
武舉丙辰追封劉光世為安成郡王丁巳遣韓元吉
等賀金主生辰庚申復置鑄錢司徒點官二員辛酉金
遣曹望之等來賀明年正且是歲隆興府江筠州臨江
興國軍大旱四川水

九年春正月辛未王之奇罷為淮南安撫使王炎罷為
觀文殿大學士提舉洞霄宮乙亥以張說同知樞密院
事戶部侍郎沈夏簽書樞密院事戊寅遣官鬻兩浙營
田及沒官田次及江東西四川如之以刑部尚書鄭聞

簽書樞密院事乙酉福建鹽復官賣法是月以措置兩
淮荆襄十六事勅安撫轉運司督諸州守臣月具所行
事奏仍審擇臧否以議黜陟閏月戊申以久雨命大理
三衙臨安府及兩浙州縣決繫囚減雜犯死罪以下一
等釋杖以下乙卯脩廬州城辛酉大風幸天竺寺玉津
園二月壬申蠲江西旱傷五州逋負米乙亥青羗奴兒
結寇安靜砦黎州推官黎商老戰死乙酉孫榮國公挺
薨追封豫國公丁亥特贈蘇軾爲太師三月甲午禁北
界博易銀絹戊申從太上皇太上皇后幸聚景園癸丑
復以進奏院隸門下後省丙辰復分淮南安撫司爲東
西路夏四月丁丑裁定武鋒軍軍額己丑皇太子解臨
安尹事五月壬辰朔日有食之己未以迪功郎朱熹屢
詔不起特改宣教郎主管台州崇道觀六月甲戌禁兩
淮荆襄四川諸州籍民戶馬己丑戒飭監司守令勸農
秋七月壬寅青羗奴兒結降辛亥吐蕃彌羗畜列陷安
靜砦引兵深入黎州守臣誘邛部川蠻擊却之八月丙
子詔興脩水利癸未分荆鄂二軍爲一以吳挺克都統
制九月丙申梁克家等上中興會要太上皇及皇帝玉
牒庚子命盱眙軍以受書禮移牒泗州示金生辰使金
使不從冬十月甲子遣留正等使金賀正旦右丞相梁

克家與同知樞密院張說議使事不合乃求去辛未克家罷爲觀文殿大學士知建寧府壬申喬雲見甲戌以曾懷爲右丞相張說知樞密院事鄭聞參知政事沈夏同知樞密院事庚辰金遣完顏襄等來賀會慶節丁亥襄等入辭別函申議受書之禮仍示虞允文速爲邊備十一月辛卯詔樞密院除授及財賦事關中書門下省其邊機軍政更不錄送戊戌合祀天地于園丘大赦改明年爲淳熙元年十二月己未朔戒勅沿邊諸軍毋輒遣間探招納叛亡甲子沈夏罷乙丑以御史中丞姚憲簽書樞密院事遣韓彥直等賀金主生辰辛未交趾入貢祭西罷廣西客鈔鹽復官般官賣法甲戌遣使措置宜州市馬乙亥以嗣濮王士鞅永陽郡王居廣平爲少保乙酉金遣完顏璋等來賀明年正旦以議受書禮不合詔俟改日以太上皇有旨姑聽仍舊丁亥璋等入見是歲浙東江東西湖北旱

淳熙元年春正月乙未禁淮西諸關採伐林木戊戌罷坐倉糴米賞庚子罷兩淮將帥權攝官丙午禁兩淮耕牛出境以交趾入貢詔賜國名安南封南平王李天祚爲安南國王二月癸酉虞允文薨辛巳爲郭浩立廟于金州三月戊子朔詔寄祿官及選人並去左右字丙申

以鄭聞爲資政殿大學士四川宣撫使戊申幸王津園
祭丑金遣梁肅等來計事夏四月戊辰從太上皇幸聚
景園壬申許桂陽軍谿洞子弟入州學聽讀乙亥詔四
川宣撫司教閱諸州將兵戊寅遣張子顏等使金報聘
己卯以姚憲參知政事戶部尚書葉衡簽書樞密院事
五月壬寅班鄭興裔所創檢驗格目六月丙辰朔詔禮
官討論別建四祖廟正太祖東嚮位戊午以興州都統
制吳挺爲定江軍節度使癸酉改江陵府爲荆南府戊
寅會懷罷癸未姚憲罷甲申落憲端明殿學士罷宮觀
以葉衡參知政事秋七月丁亥以鄭聞參知政事罷四
川宣撫司以成都府路安撫使薛良朋爲四川安撫制
置使戊子詔舉廉吏壬辰以會懷爲右丞相己酉姚憲
南康軍居住八月己未張說罷爲太尉提舉隆興府玉
隆觀以徽猷閣學士楊倓爲昭慶軍節度使簽書樞密
院事九月乙酉朔以會觀開府儀同三司壬寅幸王津
園宴射乙巳罷宜州市馬冬十月辛酉立金銀出界罪
賞壬戌遣蔡洸使金賀正旦癸亥以積雨命中外決繫
囚丙寅鄭聞薨乙亥金遣完顏讓等來賀會慶節戊寅
占城入貢辛巳再蠲林安府民身丁錢三年壬午以魏
王愷判明州蠲郴州桂陽軍借貸常平米十一月甲申

朔日有食之戊戌以禮部侍郎龔茂良參知政事楊傑
罷以葉衡兼權知樞密院事丙午曾懷罷戊申以葉衡
爲右丞相兼樞密使十二月丁巳以吏部尚書李彥穎
簽書樞密院事壬戌遣吳琚等賀金主生辰丙辰罷鐵
錢改鑄銅錢庚午詔禮官論復魏悼王襲封壬申葉衡
等上真宗王牒金遣劉仲誨等來賀明年正旦以資政
殿學士知江陵府沈夏升太學士爲四川宣撫使仍命
升差從主帥場務還軍中新四川制置使范成大改管
內制置使

二年春正月癸巳前宰相梁克家曾懷坐擅改堂除克

家落觀文殿學士懷降爲觀文殿學士甲午廢同安勸
春監丁未以兩淮諸莊歸正人安業徐子寅等行賞有
差庚戌詔籍諸軍子弟爲背嵬軍三月丙申以太上皇
壽七十詔禮官討論慶壽典禮乙巳詔武舉第一人補
秉義卽堂除諸軍計議官夏四月乙卯賜禮部進士詹
駉以下四百二十有六人及第出身己巳幸玉津園是
月茶寇賴文政起湖北轉入湖南江西官軍數爲所敗
命江州都統皇甫倜招之五月辛卯諭宰相以朝政關
失士民皆得獻言庚子命鄂州都統李川調兵捕茶寇
乙巳詔知縣三年爲任六月庚戌朔詔自今宰執侍從

以下除外任非有功績者不除職名外任人非有勞效亦不除職以沈夏同知樞密院事辛酉罷四川宣撫司以倉部郎中辛棄疾爲江西提刑節制諸軍討捕茶寇丁卯用左司諫湯邦彥言落蔣芾王炎觀文殿大學士張說落節度使芾建昌軍炎袁州說撫州並居住戊辰振濟湖南江西被寇州縣是月茶寇自湖南犯廣東秋七月辛丑有星孛于西方八月丙辰江西總管賈和仲以捕茶寇失律除名賀州編管甲子賜安南國王印丁卯蠲湖南江西被寇州縣租稅丁丑遣左司諫湯邦彥等使金申議九月乙卯朔湯邦彥請分揚廬州荆南襄陽府金州興元府興州爲七路每路文臣一人克安撫使以治民武臣一人克都總管以治兵三載視其成以議誅賞從之乙酉振恤淮南水旱州縣乙未葉衡罷丁未沈夏罷贈趙鼎爲太傅還其爵邑追封豐國公閏月丁巳以李彥穎參知政事翰林學士王淮簽書樞密院事甲子詔武臣從軍毋帶內職是月辛棄疾誘賴文政殺之茶寇平冬十月戊寅朔賞平茶寇功湖南江西廣東監帥黜陟有差庚辰大風壬午詣德壽宮加上光堯壽聖憲天體道太上皇帝尊號曰光堯壽聖憲天體道性仁誠德經武緯文太上皇帝壽聖明慈太上皇后尊

號曰壽聖齊明廣慈太上皇后乙酉遣謝廓然等使金
賀正旦戊戌金遣完顏禧等來賀會慶節十一月戊申
朔奉上太上皇太上皇后冊寶于德壽宮庚戌麗正門
內火癸丑大風戊午提點坑冶王揖進羨餘十萬緡詔
却之十二月辛巳班淳熙吏部七司法遣張宗元等賀
金主生辰甲午朝德壽宮行慶壽禮大赦文武官封父
母賞諸軍議放天下苗稅三之一大臣言國用不足廼
止丙申更定強盜贓法甲辰金遣完顏迨等來賀明年

正日

三年春正月甲寅以常州旱寬其逋負之半刪犯贓蔭

滿法振淮東饑仍命貸貧民種乙丑振恤歸正人二月
壬午蠲兩淮教閱民兵夏稅癸未以伯圭爲安德軍節
度使甲申詔四川監司帥守聞命之官毋候告勅賜韓
世忠謚曰忠武是月罷諸路鬻沒官田三月丙午朔日
有食之露雲不見辛亥上太上皇日曆于德壽宮己未
置六部編勅司癸亥幸報恩寺遂幸聚景園己巳併左
藏四庫爲二辛未詔四川制置司歲擇梁洋義士材武
者二人遣赴樞密院壬申立任子參選覆試法夏四月
戊寅詔侍從臺諫兩省官歲舉監司郡守各五人辛巳
靖州猥人寇邊遣兵討捕之丁亥雨雹己丑責受葉衡

安德軍節度副使彬州安置丁酉湯邦彥陳雷奉使無狀除名邦彥新州雷永州編管己亥詔諸路提刑歲五月理囚五月癸丑合利州東西路爲一安南國王李天祚卒戊午遣使弔祭壬申太白晝見六月乙酉減四川酒課四十七萬餘緡甲午以朱熹屢詔不起特命爲祕書郎熹不就秋七月乙丑禁浙西圍田八月乙亥以王淮同知樞密院事禮部尚書趙雄簽書樞密院事詔六察官糾察庶務臺綱益振各進二官庚辰太上皇詔立貴妃謝氏爲皇后壬午以久雨命中外決繫囚戊戌靖州徑寇平九月癸亥詔自今犯公罪至死者其蔭補具所犯奏裁著爲令冬十月甲戌以久雨命中外決繫囚丙子御文德殿冊皇后丁丑命臨安守臣嚴禁踰侈庚辰詔自今非歉歲不許鬻爵癸未遣閻蒼舒等使金賀正旦壬辰金遣蒲察通等來賀會慶節十一月癸丑合祀天地于園丘大赦庚午遣張子正等賀金主生辰十二月己丑黎州蠻寇邊官軍失利蠻亦遁去甲午詔職事官補外者復除職如故事追封吳玠爲涪王丁酉定鑄錢司歲鑄額爲十五萬緡戊戌金遣劉琬等來賀明年正旦是歲京西湖北諸州興元府金洋州旱紹興府台婺州水並振之

四年春正月戊申詔自今內外諸軍歲一閱試庚申詔
沿江諸軍歲再習水戰丙寅雨雹丁卯班淳熙曆二月
乙亥幸太學祗謁先聖退御敦化堂命國子祭酒林光
朝講中庸下詔遂幸武學謁武成王廟監學官進秩一
等諸生推恩賜帛有差己卯詔諸軍毋以未補官人任
軍職戊子立邊人逃入溪洞及告捕法癸巳立武臣授
環衛官法戊戌以新知荆南府胡元質爲四川安撫制
置使兼知成都府三月乙巳以史浩爲少保觀文殿大
學士醴泉觀使兼侍讀進封永國公己酉龔茂良等上
仁宗玉牒徽宗實錄皇帝玉牒庚戌幸玉津園宴射壬
子貸隨郢二州饑民米詔李龍翰襲封安南國王甲寅
脩韶州城丙寅幸聚景園夏四月甲戌以魏王愷爲荆
南集慶軍節度使行江陵尹判明州如故乙亥參知政
事 戊辰以曾覲從騎不避道杖之戊寅上奏乞罷改
不許甲午給歸正官子孫田屋五月庚子朔幸佑聖觀
罷四川和糴六月丁丑龔茂良罷己卯以王淮參知政
事辛巳班幸學詔癸未升蜀州爲崇慶府甲申詔自今
宰執朝殿得旨事須覆奏乃行秋七月辛丑禁江上諸
軍盜易戰馬振襄陽饑民壬寅立待補太學試法戊申
班御史臺彈奉格乙酉罷臨川伯王雱從祀癸丑龔茂

良責授寧遠軍節度副使英州安置甲寅申嚴四川入
蕃茶禁甲子班淳熙重脩勅令格式八月辛巳禁耕牛
過淮九月丁酉朔日有食之巳亥命脩築海潮所壞塘
岸辛丑免宰執以下會慶節進奉庚戌命禮官定開寶
政和祀禮戊午閱蹴鞠于選德殿冬十月丙子以久陰
命中外決繫囚遣錢良臣等使金賀正旦丁丑詔監司
守臣歲舉武臣堪知縣者各二人巳卯詔將士智勇傑
出者躡等升差丁亥金遣完顏忠等來賀會慶節十一
月丁酉詔兩淮歸正人爲強勇軍庚子以趙雄同知樞
密院事壬戌太白晝見癸亥遣趙思等賀金主生辰十

薦舉專賞格法乙亥大閱辛巳蠲太平州民貸常平錢

米壬辰金遣完顏炳等來賀明年正旦是歲福州建寧

府兩劔州水災賑之

開府儀同三司上柱國錄軍監軍事前中書右丞相監修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中監國子監監事臣黃汝良等奉

勅重校刊

孝宗三

五年春正月辛丑侍御史謝廓然乞戒有司毋以程頤
王安石之說取士從之癸卯罷特旨免臣僚及寺觀利
徭庚戌大風巳未詔侍從臺諫兩省官集議考課法二
月巳巳置州縣丁稅司辛未申嚴武臣呈試法詔二廣

母以攝官人治獄丁丑禁解鹽入京西界甲申雨土庚寅威州蠻寇邊討降之三月丁未李彥穎罷給辰沅澧靖四州刀弩手田壬子以史浩爲右丞相丁巳幸玉津園巳未以王淮知樞密院事趙雄叅知政事是春黎州蠻出降夏四月乙丑朔詔葉衡任便居住丙寅以禮部尚書范成大叅知政事辛未知紹興府張津進羨餘四十萬緡詔以代民輸和買身丁之半賜禮部進士姚穎以下四百十有七人及第出身丁丑雨土巳卯以趙思奉使不如禮罷起居舍人仍降二官丁亥命後省擇中外所言利病不戾成法者以聞五月庚子置武學國子員丁未脩臨安府城禁諸路州軍責屬縣進羨餘六月庚午飭百官及諸監司毋得請托乙亥范成大罷癸未詔京西湖北商人以牛馬負茶出境者罪死甲申詔翰林學士諫議大夫給事中中書舍人侍御史各舉堪御史者二人以給事中錢良臣簽書樞密院事巳丑罷諸州私置稅場減四川茶課十五萬餘緡庚寅蠲大理寺贓錢三萬九千餘緡閏月丙申贈強寬強震官立廟西和州賜名旌忠丁酉限四川總領會子額戊戌罷興州都統司營田官兵募民耕佃巳亥復分利州東西路爲二壬寅置鎮江建康府轉般倉龔茂良卒于英州乙巳

以魏王愷爲永興成德軍節度使雍州牧判明州如故
庚戌蠲秀州民折帛錢秋七月甲子太尉提舉萬壽觀
李顯忠薨癸未禁砂毛錢丁亥以歲豐命沿江糴米百
六十萬石以廣邊儲八月甲午詔諸路監司戒所部民
稅毋以重價強折輸錢復制科舊法丁酉詔關外四州
增募民兵爲忠勇軍戊午增銓試爲五場呈試爲四場
九月甲子定廣西賣鹽賞罰壬申幸祕書省戊寅賜岳
飛謚曰武穆冬十月戊戌史浩等上三祖下第六世仙
源類譜仁宗玉牒庚子遣宇文价等使金賀正旦辛亥
金遣張九思等來賀會慶節乙卯奉國軍節度使殿前
都指揮使王友直以募兵擾民降爲武寧軍承宣使罷
軍職統制以下奪官有差軍民謹叟者執送大理寺鞫
之戊午以孫右千牛衛大將軍擴爲明州觀察使封英
國公十一月丙寅詔軍民喧闐者並從軍法史浩言民
不宜律以軍法不聽王友直再降爲宜州觀察使信州
居住浩請罷政甲戌浩罷爲少傅還舊節克醴泉觀使
兼侍讀乙亥以錢良臣參知政事丁丑以趙雄爲右丞
相王淮爲樞密使戊寅以兩川禁卒十人爲成都府雄
邊軍庚辰復監司互察法十二月庚寅朔班新定薦舉
式辛卯遣錢冲之等賀金主生辰丁酉罷興元都統司

營田官兵募民耕佃辛丑復同安斬春監丙午禁兩淮
銅錢復行鐵錢丙辰金遣烏延察等來賀明年正旦是
歲階福建興化軍水通秦楚州高郵軍田鼠傷禾三佛
齊國入貢

六年春正月戊辰振淮東饑民庚午復置內侍省合同
憑由司壬申蠲夔州路上供金銀丁丑雨雹辛巳復置
光州中渡榷場二月巳丑朔幸佑聖觀召史浩曾覲賜
酒壬辰錢良臣以失舉贓吏奪三官丙申詔前宰執侍
從有已見利便聽不時以聞辛丑立武臣關升蔭補法
丙午詔逃軍犯強盜者毋擬貸癸丑命州縣毋撓義役

乙卯詔自今歸正官親赴部授官以革冒濫丁巳裁特
奏名試法三月庚申幸聚景園丙寅錄趙鼎岳飛子孫
賜以京秩巳巳郴州賊陳峒等破連道州桂陽軍諸縣
命湖南帥臣討捕之置廣西義倉辛未再振淮東饑民
壬申雨雹丁丑詔戒勵諸道轉運使庚辰幸玉津園夏
五月壬戌裁宗室換官法庚午蠲四川鹽課十萬緡乙
亥榔寇平癸未給襄陽歸正忠義人田六月甲午建豐
儲倉丙申詔特奏名毋授知縣縣令戊戌蠲郴州運糧
丁夫今年役錢之半辛亥廣西妖賊李接破鬱林州守
臣李端卿棄城遁遂圍化州命經略司討捕之端卿除

名勒停梅州編管秋七月癸亥籍郴州降寇隸荆鄂軍
戊辰班隆興以來寬恤詔令于諸路趙雄等上會要乙
亥詔諸軍五口以上增給緡錢癸未大白晝見經天八
月庚寅罷諸路監司帥守便宜行事壬寅以知楚州翟
畋過淮生事奪五官筠州居住九月辛未合祭天地于
明堂大赦癸未詔福建二廣賣鹽毋擅增舊額冬十月
乙酉朔蠲連州被寇民租祝辛卯遣陳峴等使金賀正
旦丙申詔太學兩優釋褐與殿試第二人恩例庚子四
川行當三大錢再蠲四川鹽課十七萬餘緡辛丑除紹
興府民逋賦五萬餘緡乙巳金遣蒲察鼎壽等來賀會

慶節戊申廣西妖賊平十一月乙卯朔帝著論數百言
深原用人之弊因及誅賞之法命宰執示從臣于都堂
辛酉裁宗子試法戊寅罷金州管內安撫司壬午詔宗
室有出身人得考試及注教授官癸未遣傅淇等賀金
主生辰十二月丙戌班重脩淳熙勅令格式丙申脩百
司省記法巳亥詔自今鞫賊吏後雖原貸者毋以失入
坐獄官庚戌金遣有律慥等來賀明年正旦辛亥蠲臨
安府征稅一年是歲温台州水和州旱

七年春正月甲子減廣西諸州歲賣鹽數乙丑劉焯以
平李接功擢集英殿脩撰將佐幕屬吏士進官減磨勘

年有差已卯詔京西州軍並用鐵錢及會子民戶銅錢
 以鐵錢或會子償之滿二月不輸官許告賞庚辰蠲淮
 東民貸常平錢米二月癸未朔初置廣南煙瘴諸州醫
 官丙戌復置皇太子宫小學教授辛卯魏王愷薨乙未
 詔撥廣西兵校五百人隸提刑司戊戌罷瓜洲孳生馬
 監已亥出湖南椿積米十萬石振糶永邵郴三州甲辰
 命利州路守貳縣令兼領營田乙巳限改官員歲母過
 八十人封子棟為宜州觀察使安定郡王三月壬戌詔
 舉賢良方正能直言極諫者庚午迎太上皇太上皇后
宴翠寒堂乙亥減內外官薦舉員丁丑再蠲臨安府民
 身丁錢三年詔諸州招補軍籍之闕自今歲以為常夏
 四月甲申辛聚景園丙戌趙雄等上仁宗哲宗王牒戊
 子除明州積欠諸司錢十五萬緡辛卯再免沿邊歸正
 人請占官田賦役三年甲辰黎州五部落犯盤陀砦兵
 馬都監高冕以綿潼大軍三千人與戰敗走蠻人深入
 大掠而去已酉命廕補武舉宗室小使臣行三年喪五
 月戊辰以吏部尚書周必大參知政事刑部尚書謝廓
 然簽書樞密院事袁州分宜縣大水捐其稅戊寅詔舒
 蘄二州鑄錢歲以四十五萬貫為額已卯申飭書坊擅
 刻書籍之禁庚辰詔特奏名年六十人母注縣尉六月

丙戌以特進觀文殿大學士判建康府陳俊卿爲少保
壬辰五部落再犯黎州制置司鈐轄成光延戰敗官軍
死者甚衆提點刑獄權州事折知常棄城遁甲午制置
司益兵遣都大提舉茶馬吳總往平之壬寅詔試刑法
官增試經義秋七月癸丑詔二廣帥臣監司察所部守
臣臧否以聞丁卯以旱決繫囚分命羣臣禱雨于山川
壬申移廣西提刑司于鬱林州八月癸未禁黎州官吏
市蕃商物甲申以禱雨未應諭輔臣欲令職事官以上
各實封言事是夕雨丁酉置湖南飛虎軍戊戌雨甲辰
五部落犯黎州塞與州左軍統領王去惡拒却之折知
常重賂蠻使之納款九月癸亥詔自今常朝毋稱丞相
名甲子命樞密使亦如之乙丑詔宰執使相給使減年
恩數身後二年者毋收使丙寅詔知縣成資始聽監司
薦舉壬申禁諸路過糴癸酉名省記法爲淳熙重脩百
司法冬十月丙戌詔限田太寬民役煩重其令臺諫給
舍同戶部長貳詳議以聞戊子遣葉宏等使金賀正旦
乙未黎州五部落進馬乞降詔却獻馬許其互市庚子
金遣李侁等來賀會慶節十一月癸丑詔邊吏存恤江
西過淮饑民丁巳禁淮南諸司州郡抑配民酒辛酉蠲
兩淮州軍二稅一年癸亥黎州戍軍伍進等作亂折知

常遁去王去惡誘進等誅之壬申南康軍旱詔出檢放
所餘苗米萬石克軍糧癸酉遣蓋經等賀金主生辰十
二月庚寅趙雄等上神宗哲宗徽宗欽宗四朝國史志
壬辰以四川制置使胡元質不備蕃部致其猖獗等兩
官罷之丙申嗣濮王士鞅薨戊戌以新除成都府路提
點刑獄祿東之權四川制置司度庫錢貼進禁潭道等
州官賣鹽甲辰立宗室命繼法夏四月癸丑脩湖南諸
州城丙辰以臨安疫分命醫官診視軍民庚申復以強
盜配隸諸軍重役丁卯安定郡王子棟薨癸酉立郴州
宜章桂陽軍臨武縣學以教養峒民子弟五月戊寅詔
監司守令勸課農桑以奉行勤怠爲賞罰壬午詔諸路
轉運司趣民間補葺經界簿籍辛卯以久雨減京畿及
兩浙囚罪一等釋杖以下貸貧民稻種錢壬寅以史浩
爲少師六月己酉詔放殿前司平江府牧馬草場二萬
畝聽民淨採戊午除淳熙七年諸路畢傷檢放米一百
三十七萬石錢二千六萬緡辛酉罷諸路坊場監官聽
民承買戊辰史浩薦薛叔似楊簡陸九淵陳謙葉適袁
燮越善譽等十六人詔並赴都堂審察七月癸未復以
許浦水軍隸殿前司永陽郡王居廣薨追封永王辛卯
賞監司守臣脩舉荒政者十六人以不雨決繫囚壬辰

紹興大水出秀婺州平江府米振糶丁酉嚴州水詔被災之家蠲其和買三等以上戶減半辛丑錄范質後八月丙午以旱罷招軍庚戌趙雄罷壬子詔紹興府諸縣夏稅和市折帛身丁錢絹之類不以名色截日並令住催癸丑以王淮爲右丞相兼樞密使措置營砦檢視沿江守備戊寅詔展巡幸之期辛亥膺罷己卯李顯忠責授清遠軍節度副使筠州安置辛巳命浙西副都總管李寶兼御營統制官措置浙西海道甲申右諫議大夫王大寶入對論移蹕以敷文閣學士虞允文爲兵部尚書兼湖北京西宣諭使戊子放宮人三十人以蕭琦爲

檢校少保河北招撫使秋七月庚寅朔以虞允文爲湖北京西制置使癸巳以湯思退爲尚書右僕射同中書門下平章事兼樞密使李顯忠再責授果州團練副使潭州安置乙未詔宿州棄軍將佐奪官貶竄有差丙申太白晝見經天罷江淮宣撫司便宜行事乙巳以旱蝗星變詔侍從臺諫兩省官條上時政闕失丁未詔徵李顯忠侵欺官錢金銀免籍其家乙卯裁減省部寺監官吏戊午給還岳飛田宅八月丙寅張浚復都督江淮軍馬庚午以劉寶兼淮東招撫使丙子以飛蝗風水爲災避殿減膳罷借諸路職田之令戊寅金紇石烈士寧又

以書求海泗唐鄧四州地及歲幣癸未復以龍大淵知
閣門事曾覲同知閣門事丙戌遣淮西安撫司幹辦公
事盧仲賢等齎書至金帥府戒勿許四州差減歲幣仍
命諸將毋遣兵人出境九月巳酉地震甲寅以謝廓然
同知樞密院事丙辰更後殿幄次爲延和殿巳未以觀
文殿大學士新四川制置使趙雄知瀘州戊辰言者請
自今歉歲蠲減經費有虧令戶部據實以聞母得督趣
巳蠲閣之數從之罷諸路補葺經界簿籍九月庚辰命
諸路提舉司貸民麥種辛巳錢良臣罷庚寅以謝廓然
兼權參知政事冬十月巳酉遣施師點等使金賀正月

辛酉錄黎州戰歿將士四百三人甲子金遣完顏寔等
來賀會慶節詔災傷州縣諭民振糶十一月甲戌以旱
傷罷喜雪宴戊寅蠲富陽新城錢塘夏稅庚寅前池州
守趙粹中誤斬遞卒汪青落職仍詔給青家衣糧十五
年辛卯詔兩省侍從臺諫各舉所知浚行在至鎮江府
運河丁酉遣燕世良賀金主生辰巳亥振臨安府及嚴
州饑民庚子再詔臨安府爲粥食饑民辛丑以淳熙元
年減半推賞法募民振糶十二月癸卯朔以徽饒二州
民流者衆罷守臣官出南庫錢三十萬緡付新浙東提
舉常平朱熹振糶丁未禁諸州營造戊申諡劉安世曰

忠定辛亥蠲諸路旱傷州軍明年身丁錢物甲寅雨雹以度僧牒募閩廣民入米丙辰詔縣令有能舉荒政者監司郡守以名聞甲子下朱熹社倉法于諸路戊辰金遣魏貞吉等來賀明年正旦以爭執進書儀帝還內遣王朴往諭旨己巳貞吉奉書入見是月廣東安撫鞏湘誘潮賊沈師出降誅之是歲江浙兩淮京西湖北潼川夔州等路水旱相繼發廩蠲租遣使按視民有流入江北者命所在振業之

九年春正月甲戌詔四孟朝獻分用三日如在京故事丁丑命兩淮戍兵歲一更癸未罷樞密都承旨王朴爲在外宮觀因罷諸軍承受復密院文書關錄兩省舊法以文臣爲都承旨戊子糴廣南米赴行在庚寅詔江浙兩淮旱傷州縣貸民稻種計度不足者貸以椿積錢二月庚戌遣使訪問二廣鹽法利害戊辰四川制置司言獲叙州賊大波浪三月辛未朔幸佑聖觀詔振濟忠萬恭涪四州癸未振濟鎮江壬辰遣使按親淮南江浙振濟甲午罷諸路寄招軍兵三年就揀軍子弟補其闕夏四月甲辰詔自今盜發所在親臨帥守監司論罰平定有勞者議賞乙卯詔諸路提刑文武臣通置一員癸亥帝覽陸贄奏議諭講讀官曰今日之政恐有如德宗之

弊者卿等條陳來上無有所隱五月癸酉以孫柄為右
千牛衛次將軍丙子詔輔臣擇監司郡守必先才行六
月壬寅詔侍從臺諫各舉操脩端亮風力彊明可克監
司者一二人甲寅蠲犒賞庫酒課二十二萬餘緡汀漳
二州民為沈師蹂踐者除其賦丁巳給臨安府貧民棺
瘞錢戊午謝廓然薨庚申太白晝見臨安府蝗詔守臣
亟加焚瘞甲子太白晝見經天秋七月甲戌以江西常
平義倉及椿管米四十萬石付諸司預備振糶辛巳出
南庫錢三十萬緡付浙東提舉朱熹以備振糶壬辰以
資政殿學士李彥穎參知政事詔發所儲和糶米百四
十萬石補淳熙八年振濟之數于沿江屯駐諸州椿官
八月己亥朔詔紹興民戶去歲已納夏稅應減者三十
萬緡理為今年之數庚子減皇后內命婦蔭補數立文
武臣遇郊奏薦員限致仕遺表恩澤視舊法損三之一
淮東浙西蝗壬子定諸州官捕蝗之罰乙卯復賞脩舉
荒政監司守臣九月己巳朔罷諸路科買軍器物料三
年庚午以王淮為左丞相梁克家為右丞相丙子以子
彤為容州觀察使封安定郡王辛巳大享明堂大赦乙
酉以錢引十萬緡賜瀘州備振糶辛卯封伯圭為榮陽
郡王以旱減恭合渠昌州今年酒課癸巳太白晝見乙

未禁蕃舶販易金銀著爲令十月戊戌朔遣王蘭等使
金賀正旦丙午罷軍器所招軍辛亥塞四川沿邊支徑
戊午金遣完顏宗回等來賀會慶節甲子蠲諸路旱傷
州軍淳熙七年八年逋賦出縣官緡錢以償戶部十一
月戊辰朔禁臣庶之家婦飾僭擬庚午振夔路饑乙酉
進奏院火丙戌遣賈選等賀金主生辰戊子大風十二
月己亥更二廣官賣鹽法復行客鈔仍出緡錢四十萬
以備漕計之闕癸亥金遣李木魯正等來賀明年正旦
十年春正月丁丑以給事中施師點簽書樞密院事命
州縣掘蝗甲申李彥穎罷乙酉命二廣提舉鹽事官互
指置鹽事丙戌以施師點兼權參知政事丁亥詔終身
任宮觀人母得奏子己丑詔罷廣南官鬻鹽法壬辰罷
江東浙西寄招鎮江諸軍三年二月癸卯提舉德壽宮
陳源有罪竄建寧府尋移郴州仍籍其家貲進納德壽
宮三月戊辰李燾上續資治通鑑長編六百八十七卷
辛未有司請造第七界會子辛巳免四川和糴三年癸
未幸玉津園戊子詔四川類試自今十六人取一人己
丑除詐稱災傷籍產法癸巳復銓試舊法罷試雜文夏
四月丙申再蠲臨安府民丁身錢三年己亥命湖南廣
西堙塞溪洞徑路五月丙寅增皇太子宫小學教授一

員甲戌以潭州飛虎軍隸江陵都統司戊寅幸聚景園
辛卯詔疏襄陽木渠以渠傍地爲屯田尋詔民間侵耕
者就給之廢舒州宿松監六月戊戌監察御史陳賈請
禁僞學乙巳罷昭州歲貢金己未詔諸路監司帥臣歲
舉廉吏庚申嚴贓吏禁秋七月乙丑以不雨決繫囚丙
寅幸明慶寺禱雨甲戌以夏秋旱曠避殿減膳令侍從
臺諫兩省卿監郎官館職各陳朝政闕失分命羣臣禱
雨于天地宗廟社稷山川左丞相王淮等以旱乞罷不
許丁丑詔除災傷州縣淳熙八年欠稅甲申雨己丑御
殿復膳八月戊申以施師點參知政事兼同知樞密院
事御史中丞黃洽參知政事庚戌以史浩爲太保魏國
公致仕庚申以左藏南庫隸戶部九月乙丑長溪寧德
縣大水丙寅嚴盜販解鹽法丁丑幸佑聖觀壬午蠲諸
州逋負內藏庫錢六十萬緡乙酉遣余端禮等使金賀
正旦丁亥禁內郡行鐵錢冬十月乙未詔兩浙義役從
民便壬子金遣完顏方等來賀會慶節十一月壬戌朔
日有食之乙丑降會子收兩淮銅錢甲戌幸龍山大閱
遂幸玉津園閏月壬寅詔却安南獻象丁巳遣陳居仁
等賀金主生辰十二月丙子朝德壽宮行太上皇后慶
壽禮推恩如太上皇故事丁亥金遣完顏婆盧火等來

賀明年正旦是歲福漳台信吉州水京西金澧州南平
荆門興國廣德軍江陵建康鎮江紹興寧國府旱

十一年春正月辛卯朔雨土辛丑安化蠻蒙光漸等犯
宜州思立砦廣西兵馬幹轄沙世堅出兵討之獲光漸

丙午詔江東西路諸監司義役差役從民便甲寅雨土
二月甲申詔兩淮京西湖北萬弩手今在家閱習每州

許歲上材武者一二人試授以官如四川義士之制三
月辛卯詔刑部御史臺每季以仲月錄囚徒癸巳命利

路三都統吳挺郭鈞彭杲密陳出師進取利害以備金
人復金州管內安撫司甲午以上津潮陽旱蠲其稅辛

丑罷秀州御馬院莊歸其侵地于民丁未禁淮民招溫

處州戶口除職田官田八年逋租庚戌詔御試策有及
軍民利害者考官哀類以聞辛亥史浩入謝賜宴于內
殿夏四月甲子以興元義勝軍移戍襄陽戊辰賜禮部
進士衛涇以下三百九十四人及第出身癸未重班紹
興申明刑統五月戊子朔蠲崇德等十六縣小民淳熙
十年欠稅十四萬緡癸卯命刑部大理寺議減刺配法
甲寅出緡錢三十萬犒給四川久戍將士乙卯太白晝
見六月戊午朔詔諸道總領舉偏裨可將帥者庚申以
周必大爲樞密使壬戌詔在內尚書侍郎兩省諫議大

夫以上御史中丞學士待制在外守臣監司不限科舉
年分各舉賢良方正能直言極諫一人己卯詔諸州歲
買稻種備農民之闕秋七月癸卯蠲減浙東敗闕坊場
酒課癸丑以浙西江東水禁諸州過糴甲寅築黎州要
衝城八月庚申遣章森使金賀正旦九月丁亥詔諸路
添差官自今毋創置乙巳詔殿前軍子弟許權收刺一
次甲寅再減四川酒課六十八萬餘緡冬十月甲子初
命舉改官人犯贓者舉主降二官乙丑遣王信等賀金
主生辰庚午禁諸州增收稅錢丙子金遣張大節等來
賀會慶節軒貽軍言得金人牒以上京地寒來歲正旦

生辰人使權

一年壬午詔諸以忠義立廟者兩淮

臣繕治之十一月壬寅禁福建民私有兵器癸卯助廣
西諸州歲計十萬緡甲寅令峽州歲時存問處士郭雍
十二月丁巳脩湖南府城己卯詔戒監司州縣毋得於
常賦外追取於民是歲江東浙西諸州水福建廣東吉
贛州建昌軍興元府金洋西和州旱

十二年春正月己丑禁交趾鹽入省地壬辰四川制置
使留正遣人誘青羗奴兒結殺之戊戌日中有黑子戊
申賜任伯雨諡曰忠敏庚戌日中復有黑子二月辛酉
雨雹乙亥罷諸軍額外制領將佐庚辰置黎州防邊義

勇二月乙酉進孫擴爲安慶軍節度使封平陽郡王辛卯禁習渤海樂辛亥命侍從臺諫兩省總領管軍官各舉堪都副統制者一二人癸丑除稅場高等累賞法夏四月甲子幸聚景園戊辰班淳熙寬恤詔令丙子謀言故遼大石林牙假道夏人以伐金密詔吳挺與留正議之己卯幸玉津園五月庚寅地震辛卯福州地震詔帥臣趙汝愚察守令擇兵官防盜賊六月乙卯立淮東彊勇軍效用効士法壬戌除諸軍逋欠營運錢丁丑詔浙東帥臣監司不以時上諸州臧否奪一官戊寅太白晝

見秋七月丁酉太白晝見經天壬寅詔一廣試攝官知銓試例取其半甲辰以淮西屯田鹵莽總領軍帥漕臣

守臣奪官有差八月癸亥詔太上皇壽八十令有司議慶壽禮乙丑詔戶部給金臺諫詳議官民戶役法以聞九月甲申復二廣監司以下到罷酬賞法丙戌詔恤湖州台州被水之家庚寅遣王信等使金賀正旦丁丑詔諸路總領軍帥漕臣守臣歲上屯田所收之數冬十月辛亥加上太上皇尊號曰光堯壽聖憲天體道性仁誠德經武緯文紹業興統明謨盛烈太上皇帝太上皇后曰聖壽齊明廣慈備德太上皇后甲寅蠲施黔州經制無額錢命侍從各舉宗室二三人癸亥詔諸路臧否以

三月終四川二廣以五月終來上十一月丁亥鄂州大火戊子雷壬辰遣章森等賀金主生辰辛丑合祀天地于園丘大赦十二月庚戌朔帥羣臣奉上太上皇太上皇后冊寶于德壽宮推恩如紹興三十三年故事甲子以知福州趙汝愚為四川制置使丙子金遣僕散守忠等來賀明年正旦

十三年春正月庚辰朔率羣臣詣德壽宮行慶壽禮大赦文武臣僚並理三年磨勘免貧民丁身錢之半為一百一十餘萬緡內外諸軍犒賜共一百六十萬緡癸巳

以史浩罷太傅陳俊卿為少師嗣漢王士欽為少保庚

子以昭慶軍節度使士峴為開府儀同三司二月甲寅詔強盜兩次以上雖為從論死庚申詔舉歸正添差任滿人才藝堪從軍者三月丁酉詔職事官改官許在歲額八十員之外合提舉廣南東西鹽事司為一甲辰幸玉津園夏四月辛亥詔吳挺結約夏人戊辰再蠲四川和糴軍糧三年辛未幸聚景園五月癸未日中有黑子甲申詔非泛補官及七色補官人非曾任在朝侍從者品秩雖高母得免役丙申賜冲晦處士郭雍號曰頤正先生仍遣官就問雍所欲言備錄來上秋七月壬辰詔內外諸軍主帥各舉堪統制者二三人壬寅諡胡銓曰

忠簡閏月丙午朔雨雹戊申以敷文閣學士留正簽書
樞密院事已酉施師點乞免兼同知樞密院事許之已
未五星皆伏八月乙亥朔日月五星聚于軫丙子以故
相曾懷鸞奏補恩追落觀文殿大學士壬午新築江陵
城成九月乙巳詔偽造會子凡經行用並處死是月遣
李獻等使金賀正旦冬十月甲戌朔福州火甲午金遣
完顏老等來賀會慶節十一月戊午詔四川制置司通
知馬政量收木渠民包占荒田租庚申遣張叔椿等賀
金主生辰甲子王淮等上仁宗英宗玉牒神宗哲宗徽
宗欽宗四朝國史列傳皇帝會要丙寅梁克家罷爲觀

文殿大學士禮泉觀使兼侍讀辛未裁定百司吏額

二月丙子思州田氏獻納所買黔州民省地詔償其直
辛巳減汀州鹽價歲萬緡甲午陳俊卿薨乙未振臨安
府城內外貧乏老疾之民戊戌大理寺獄空己亥金遣
耶律子元等來賀明年正旦辛丑再賜軍士雪寒錢是
歲利州路饑江西諸州旱

十四年春正月癸亥出四川椿積米貸濟金洋州及關
外四州饑民二月丁亥以周必大爲右丞相戊子以施
師點知樞密院事三月甲子幸玉津園夏四月己卯置
籍考諸路上供殿最以爲賞罰戊子賜禮部進士王容

以下四百三十五人及第出身五月乙巳成都火巳酉
遣官措置汀州經界六月戊寅以久旱班畫龍祈雨法
甲申幸太一宮明慶寺禱雨丁亥梁克家薨庚寅臨安
府火辛卯太白晝見癸巳王淮等以旱求罷不許詔衡
州葺炎帝陵廟巳亥減兩浙路囚罪一等釋杖以下科
七月辛丑罷戶部上供殿最丙午詔羣臣陳時政闕失
及當今急務丁未以旱罷汀州經界巳酉詔監司條上
州縣弊事民間疾苦辛亥避殿減膳徹樂癸丑命檢正
都司看詳羣臣封事有可行者以聞詔省部漕臣催理
已獨通欠者令臺諫覺察權減秀州經總制糴本錢半
年丙辰命臨安府捕蝗募民輸米振濟除紹興新科下
戶今年和市布帛二萬八千匹辛酉江西湖南饑給度
僧牒鬻以糴米備振糴戊辰雨命給舍看詳監司所條
弊事八月辛未賜度牒一百道米四萬五千石備振紹
興府饑甲戌御殿復膳癸未以留正參知政事兼同知
樞密院事丙戌復夔路酬賞法九月癸卯太上皇不豫
乙巳詣德壽宮問疾丙午遣萬鍾等使金賀正己未
詣德壽宮問疾乙丑罷增收木渠民田租丙寅除官軍
私負冬十月辛未以太上皇不豫赦壬申詣德壽宮問
疾癸酉分遣羣臣禱于天地宗廟社稷甲戌以太上皇

未御常膳自來日不視朝宰執奏事內殿乙亥詣德壽宮侍疾太上皇帝崩于德壽殿遺詔太上皇后改稱皇太后奉皇太后旨以奉國軍承宣使甘昇主管太上皇喪事丙子以韋璞等爲金告哀使戊寅以榮陽郡王伯圭爲攢宮總護使翰林學士洪邁言大行皇帝廟號當稱祖詔有司集議以聞己卯詔尊皇太后辛巳詔曰大行太上皇帝奄棄至養朕當衰服三年羣臣自遵易月之令可令有司討論儀制以聞甲申用禮官顏師魯等言大行太上皇帝上繼徽宗正統廟號稱宗乙酉百官五上表請帝還內聽政丙戌詔俟過小祥勉從所請戊子

帝衰經御素輦還內以顏師魯等克金國遺留國信使已丑金遣田彥皐等來賀會慶節詔免入見却其書幣甲午詣德壽宮自是七日皆如之十一月戊戌崩詣德壽宮自是朔望皆如之己亥大行太上皇帝大祥自是帝以白布巾袍御延和殿詣德壽宮衰經而杖如初詔皇太子惇參決庶務庚子皇太子三辭參決庶務不許辛丑詣德壽宮禪祭百官釋服甲辰羣臣三上表請御殿聽政詔俟過耐廟戊申遣胡晉臣等賀金主生辰辛亥冬至詣德壽宮甲寅西南方有赤氣隨日入乙卯雷戊午詔皇太子參決庶務于議事堂在內寺監在外守

臣以下與宰執同除授訖乃奏已未詔三日一朝德壽宮十二月庚午大理寺獄空壬午東北方有赤氣隨日出癸巳金遣完顏崇安等來賀明年正旦見于垂拱殿之東楹素幄詔禮物毋入殿付之有司是歲兩浙江西淮西福建旱振之

十五年春正月丁酉朔詣德壽宮凡筵行禮戊戌皇太子初決庶務于議事堂辛丑復置左右補闕拾遺乙巳詔免諸州軍會慶節進奉二年詔自今御內殿令皇太子侍立庚申施師黜罷甲子以黃洽知樞密院事吏部尚書蕭德參知政事二月丁亥金遣蒲察克忠等來吊

祭行禮于德壽殿次見帝于東楹之素幄癸巳遣京鏗等使金報謝三月庚子王淮等上大行太上皇諡曰聖神武文憲孝皇帝廟號高宗乙巳上高宗諡冊寶于德壽殿又上懿節皇后改諡憲節冊寶于別廟本室丁未右丞相周必大攝太傅持節導梓宮癸丑用洪邁議以呂頤浩趙鼎韓世忠張俊配饗高宗廟庭吏部侍郎章森乞用張浚岳飛秘書少監楊萬里乞用浚皆不報丙寅權輦高宗于永思陵夏四月壬申帝親行奉迎虞主之禮自是七虞八虞九虞卒哭奉辭皆如之乙亥詔洪邁楊萬里並予郡甲申用禮官尤袤請詔羣臣再集議

配享臣僚丙戌祔高宗神主于大廟詔曰朕比下令欲
衰經三年羣臣屢請御殿易服故以布素視事內殿雖
詔俟過祔廟勉從所請然稽諸典禮心實未安行之終
制乃爲近古宜體至意勿復有請己丑詔減臨安紹興
府囚罪一等釋杖以下民緣橫宮役者蠲其賦庚寅用
御史冷世光言罷再議配享皇太后有旨車駕一月四
詣德壽宮如舊禮五月己亥王淮罷乙巳帝旣用薛叔
似言罷王淮詔諭叔似等曰卿等官以拾遺補闕爲名
不任糾劾今所奏乃類彈擊甚非設官命名之意宜思
自警丁巳詔脩高宗實錄己未祈雨縣大水壬戌始御
後殿詔歲出錢五萬六千餘緡減廣東十二州折納米
價錢六月丁卯雨雹戊辰罷勅令所己巳以伯圭爲少
傅帶御器械夏執中爲奉國軍節度使癸酉以新江西
提點刑獄朱熹爲兵部郎官熹以疾未就職侍郎林栗
劾熹慢命熹乞奉祠太常博士葉適論栗襲王淮鄭丙
陳賈之說爲道學之目妄廢正人詔熹仍赴江西熹力
辭不赴庚寅熒惑犯太微秋七月戊戌上高宗廟樂曰
大勳舞曰大德己未出兵部侍郎林栗壬戌恩平郡王
璩薨追封信王八月甲子朔日有食之九月庚子夜南
方有赤黃氣覆大內辛丑大饗明堂以太祖太宗配大

宋史卷三十五
本紀
三十三
赦癸卯更試補醫官法巳酉遣鄭僑等使金賀正旦甲寅上皇太后宮名慈福冬十月癸未金遣王克溫等來賀會慶節見于垂拱殿東楹甲申會慶節詔北使百官詣東上閣門拜表起居免入賀巳丑再罷諸州科買軍器物料三年十一月庚子建煥章閣藏高宗御集遣何澹賀金主生辰甲辰詔百官輪對母過三奏十二月丙寅追復龔茂良資政殿學士壬午命朱熹主管西太一宮兼崇政殿說書辭不至戊子金遣田彥臯等來賀明年正旦是歲江西湖北兩淮建寧府徽州水

嘉國公丙申黃洽罷巳亥以周必大爲左丞相留正爲右丞相蕭燧兼權知樞密院事禮部尚書王藺參知政事刑部尚書葛邲同知樞密院事乙巳蕭燧罷丙午皇太后初御慈福宮戊申以昭慶軍承宣使郭師禹爲保大軍節度使辛亥罷淮西屯田是日帝始諭二府以旬日當內禪命周必大留身呈詔草丙辰罷拘催錢物所復二廣官般官賣鹽法巳未更德壽宮爲重華宮諡李綱曰忠定二月辛酉朔日有食之壬戌下詔傳位皇太子是日皇太子卽皇帝位帝素服寫之重華宮辛未上尊號曰至尊壽皇聖帝皇后曰壽成皇后紹熙五年五

月壬戌壽皇聖帝不豫六月戊戌崩于重華殿年六十
有八十月丙辰諡曰哲文神武成孝皇帝廟號孝宗十
一月乙卯權輦于永阜陵十二月甲戌祔于太廟慶元
三年十一月辛丑加諡紹統同道冠德昭功哲文神武
明聖成孝皇帝

贊曰高宗以公天下之心擇太祖之後而立之乃得孝
宗之賢聰明英毅卓然爲南渡諸帝之稱首可謂難矣
哉卽位之初銳志恢復符離邂逅失利重違高宗之命
不輕出師又值金世宗之立金國平治無釁可乘然易
表稱書改臣稱煙滅去歲幣以定鄰好金人易宋之心

至是亦寢異於前日矣故世宗每戒羣臣積錢穀謹邊
備必曰吾恐宋人之和終不可恃蓋亦忌帝之將有爲
也天厭南北之兵欲休民生故帝用兵之意弗遂而終
焉然自古人君起自外藩入繼大統而能盡宮庭之
孝未有若帝其間父子怡愉同享高壽亦無有及之者
終喪三年又能却羣臣之請而力行之宋之廟號若仁
宗之爲仁孝宗之爲孝其無愧焉其無愧焉

開府儀同三司柱國錄軍國事兼中書右丞相監修國史領經筵事都總裁脫脫等修
皇明朝列大夫國子監祭酒臣方從哲

承德郎右春坊庶子管國子監書事臣黃汝良等奉

勅重校刊

光宗

光宗循道憲仁明功茂德溫文順武聖哲慈孝皇帝諱
惇孝宗第三子也母曰成穆皇后郭氏紹興十七年九
月乙丑生于藩邸二十年賜名授右監門衛率府副
率轉榮州刺史孝宗即位拜鎮姚軍節度使開府儀同

三司封恭王及莊文太子慶孝宗以帝英武類已欲立
爲太子而以其非次遲之乾道六年七月太史奏木火
合宿主冊太子當有赦是時虞允文相因請蚤建儲貳
孝宗曰朕父有此意事亦素定但恐儲位旣正人性易
驕卽自縱逸不勤於學浸有失德朕所以未建者更欲
其練歷庶務通知古今庶無後悔爾七年正月丙子朔
孝宗上兩宮尊號冊寶禮成丞相允文復以請孝宗曰
朕旣立太子卽令親王出鎮外藩卿宜討論前代典禮
允文尋以聞二月癸丑乃立帝爲皇太子慶王愷爲雄

武原寧軍節度使判寧國府進封魏王三月丁酉慶皇

太子冊四月甲子命判臨安府尋領尹事帝之爲恭王
與講官商較前代時出意表講官自以爲不及逮尹臨
安究心民政周知情僞孝宗數稱之且語丞相趙雄曰
太子資質甚美每遣人來問安朕必戒以留意問學淳
熙十四年十月乙亥高宗崩十一月己亥百官大祥畢
孝宗手詔皇太子可令參決庶務以內東門司爲議事
堂十五年二月戊戌帝始赴議事堂自是間日與輔臣
公裳繫鞋相見內外除擢自館職部刺史以上乃以聞
九月乙巳又詔每遇朝殿令皇太子侍立十一月丞相
周必大乞去孝宗諭曰朕比年病倦欲傳位太子卿須

少留會陳康伯家以紹興傳位御劄來上十二月壬申
孝宗遣中使密持賜必大因令討論典禮既又密以憚
意諭參知政事留正十六年正月辛亥兩府奏事孝宗
諭以倦勤欲禪位皇太子退就休養以畢高宗三年之
制因令必大進呈詔草二月壬戌孝宗吉服御紫宸殿
行內禪禮應奉官以次稱賀內侍固請帝坐帝固辭內
侍扶掖至七八乃微坐復興次丞相率百僚稱賀禮畢
樞密院官升殿奏事帝立聽班退孝宗反喪服御後殿
帝侍立尋登輦同詣重華宮帝還內卽上尊號曰至尊
壽皇聖帝皇后曰壽成皇后壽皇聖帝詔立帝元妃李

氏爲皇后甲子帝率羣臣朝重華宮大赦百官進秩一
級優賞諸軍蠲公私逋負及郡縣淳熙十四年以前稅
役丙寅帝率羣臣詣重華宮上尊號冊寶以閣門舍人
譙熙載姜特立並知閣門事庚午詔五日一朝重華宮
辛未尊皇太后曰壽聖皇太后壬申詔內外臣僚陳時
政闕失四方獻歌頌者勿受遣羅點等使金告卽位癸
酉詔戒敕將帥賜前宰執從官詔訪以得失乙亥詔兩
省官詳定內外封章其要切者以聞遣諸葛廷瑞等使
金弔祭丙子詔戒敕官吏已卯詔官吏贓罪顯著者重
罰母貸辛巳以生日爲重明節丁亥詔百官輪對己丑

詔編壽皇聖政庚寅詔中書舍人羅點具可爲臺諫者
點以葉適吳鎰孫逢吉張體仁馮震武鄭湜劉崇之沈
清臣八人上之二月壬辰以周必大爲少保留正轉正
奉大夫丙申遣沈揆等使金賀卽位詔侍從兩省臺諫
各舉可任湖廣及四川總領者一人己亥子擴進封嘉
王癸卯金遣王元德等來告哀戊申以壽皇却五日之
朝詔自今月四朝重華宮甲寅以史浩爲太師伯圭爲
少師少保士歆爲少傅昭慶軍節度使士峴爲少保戊
午金遣張萬公等來致遺留物己未以左補闕薛叔似
爲將作監右拾遺許及之爲軍器監拾遺補闕官自此

罷詔東宮書簿並賜嘉王夏四月丙寅有事于太廟丁
卯四川應起經總制錢存留三年代輸鹽酒重額癸酉
姪柄進封許國公乙亥以兩浙犒賞酒庫隸諸州歲入
六十五萬尋減三十萬戊寅金遣徒單鎰等來告卽位
以權兵部侍郎何澹爲右諫議大夫丙戌有事于景靈
宮五月甲午以王藺知樞密院事兼參知政事丙申周
必大罷爲觀文殿大學士判潭州常德府辰沅靖州大
水入其郭丁酉詔丞相以下月一朝重華宮戊戌罷周
必大判潭州之命許以舊官爲醴泉觀使戊申以和義
郡夫人黃氏爲貴妃右丞相留正論知閣門事姜特立

罷之閏月庚申朔詔內侍陳源許在外任便居住免郡
縣淳熙十四年以前私負十五年以後輸息及本者亦
蠲之壬戌以趙雄爲寧武軍節度使開府儀同三司進
封衛國公仍判江陵府庚午詔罷賣浙西常平官田癸
酉詔季秋有事于明堂以高宗配丙子趙雄疾甚改判
資州戊寅蠲郡縣第五等戶身丁錢及臨安第五等戶
和買絹各一年仍出錢二十三萬緡振臨安貧民己卯
階州大水入其郭壬午大理獄空乙酉御後殿慮囚六
月庚寅鎮江大水入其郭癸卯詔自今臣僚奏請事涉

以法者二省樞密院詳具以聞秋七月辛酉儒林郎倪

恕等以封事可采遷官免文解有差戊辰遣謝深甫等
賀金主生辰庚辰下詔恤刑八月甲午升恭州爲重慶
府丙申減兩浙月椿等錢歲二十五萬五千緡己亥王
淮薨癸丑金遣溫迪罕蕭等來賀卽位九月癸亥金遣
完顏守真等來賀重明節減紹興和買絹歲額四萬四
千餘匹乙丑戒執政侍從臺諫毋移書以薦舉請託南
劍州火降其守臣一官仍令優加振濟戊辰詔侍從各
舉公正彊敏之士嘗任守令及職事官材堪御史者一
人甲戌詔監司帥守秩滿到闕薦所部廉吏一二人遣
郭德麟等使金賀正旦冬十月庚子罷樞密院審察諸

軍之制壬寅蠲楚州高郵盱眙軍民負常平米一萬四千餘石甲寅大閱十一月庚午詔改明年爲紹熙元年復置嘉王府翊善以秘書郎黃裳爲之乙亥詔陳源毋得輒入國門丁丑減江浙月椿錢額十六萬五千餘緡十二月壬子金遣裴滿餘慶等來賀明年正旦

紹熙元年春正月丙辰朔帝率羣臣詣重華宮奉上壽聖皇太后至尊壽皇聖帝壽成皇后冊寶壬申再蠲臨安府民身丁錢三年壬午何澹請置紹熙會計錄紹何澹同戶部長貳檢正都司稽考財賦出入之數以聞二月丁酉雨雹辛亥殿中侍御史劉光祖言道學非程氏

私一己之定是非別邪正從之三月丁卯詔秀王襲封置園廟班安僖王諱錄趙普後一人庚午以久雨釋杖以下囚夏四月乙酉詔兩淮措置流民己丑以伯圭爲太保嗣秀王丁未殿中侍御史劉光祖以論帶御器械吳端罷戊申賜禮部進士余復以下五百三十有七人及第出身五月乙卯趙雄坐所舉以賄敗降封益川郡公削食邑一千戶己未出吳端爲浙西馬步電副總管丙寅脩楚州城丙子太白晝見六月丁亥遣丘富等加只金主生辰丙申以上供等錢償廣州放免身丁錢數甲午御後殿慮囚秋七月癸丑詔秀王諸孫並授南班甲寅

以葛邲參知政事給事中胡晉臣簽書樞密院事乙卯
以留正爲左丞相王藺樞密院使癸酉建秀王祠堂于
行在八月辛卯立任于中銓人吏部簾試法己亥帝幸
羣臣上壽皇聖帝玉牒日曆于重華宮己酉詔造新曆
九月丁巳金遣王脩等來賀重明節己未升劍州爲隆
慶府辛酉雷庚午遣蘇山等使金賀正旦冬十月丁酉
詔內外諸軍自今毋置額外制領以下官丙午詔內外
軍帥各薦所部有將才者庚戌詔諭郡縣吏奉法愛
民十一月甲寅安南入貢壬戌潼川轉運判官王漑擢
節漕計代輸井戶重額錢十六萬緡詔獎之十二月辛
巳朔贈左千牛衛大將軍挺爲保寧軍節度使壬午賜
王倫諡曰節愍丙戌罷王藺樞密使戊子以葛邲知樞
密院事胡晉臣參知政事兼同知樞密院事癸卯詔歲
減廣東官賣鹽丙午金遣把德固等來賀明年正旦戊
申浦城盜張海作亂詔提點刑獄豐誼捕之

二年春正月庚戌朔命兩淮行義倉法壬子詔尊高宗
爲萬世不祧之廟庚申修六合城辛酉金主母徒單氏
殂戊寅雷電雨雹二月庚辰朔大雨雪壬午遣宋之瑞
等使金弔祭癸未名新歷曰會元甲申福建安撫使趙
汝愚等以盜發所部與守臣監司各降秩一等縣令追

停乙酉詔以陰陽失時雷雪交作令侍從臺諫兩省卿
監郎官館職各具時政闕失以聞出米五萬石賑京城
貧民權罷修皇后家廟辛卯布衣余古上書極諫帝怒
詔送筠州學聽讀丁未金遣完顏亶等來告哀三月丙
辰詔監司郡守互送以贓論丁巳詔自今邊事令宰相
與樞密院議仍同簽書丙寅詔福建提點刑獄陳公亮
知漳州朱熹同措置漳泉汀三州經界丁卯增廣州推
鋒軍三百人癸酉建寧府雨雹大如桃李壞民居五千
餘家溫州大風雨雷雹田苗葉果蕩盡丙子出右司諫
鄧駟夏四月乙酉從壽皇聖帝壽成皇后幸聚景園丙
甲詔侍從兩省臺諫及在外侍從之臣各舉所知嘗任
監司郡守可克郎官卿監及資歷未深可克諸職事官
者各三人辛丑徽州火二日乃滅五月巳酉朔福州水
辛亥詔六院官許輪對仍入雜壓庚申詔侍從經筵翰
苑官自今並不時宣對庶廣咨詢以補治道戊辰金州
大火巳巳潼川崇慶二府大安石泉淮安三軍興利果
合綿漢六州大水六月戊寅詔監司到任半年條上裕
民事如郡守庚辰遣趙靡等賀金主生辰丁亥以伯圭
判大宗正事癸巳詔宰臣執政自今不時內殿宣引奏
事秋七月丁未朔詔故容州編管人高登追復元官仍

贈承務郎己未出會子百萬緡收兩淮私鑄鐵錢乙丑
復置太醫局己巳興州大水漂沒數千家八月戊寅何
澹以本生繼母喪去官甲申寬兩浙權鐵之禁九月壬
子金遣完顏堯等來賀重明節召知福州趙汝愚為吏
部尚書壬戌禁職田折變癸亥遣黃申等使金賀正旦
乙丑以久雨命大理三衙臨安府及兩浙決繫囚釋杖
以下巳巳詔侍從於嘗任卿監郎官內選堪斷刑長貳
一二人以聞冬十月丙子朔詔罷經界丁丑築福州外
城庚辰減百官大禮賜物三之一甲申復吳端帶御器
械辛卯詔守令毋征歛病民庚子下詔撫諭四川被水

州軍十一月戊申安定郡王子彤薨己巳冊加高宗徽
號曰受命中興全功至德聖神文武文昭仁憲孝皇帝辛
未有事于太廟皇后李氏殺皇貴妃以暴卒聞壬申合
祭天地于園丘以太祖太宗配大風雨不成禮而罷帝
既聞貴妃薨又值此變震懼感疾罷稱賀肆赦不御樓
壽皇聖帝及壽成皇后來視疾帝自是不視朝十二月
庚辰築荆門軍城丁亥帝始對輔臣于內殿乙未增楚
州更戍兵一千五百人庚子復出會子百萬緡收兩淮
鐵錢辛丑金遣完顏宗璧等來賀明年正旦壬寅資簡
普榮四州及富順監旱甲辰詔慶遠軍承宣使內侍省

宋史卷三十六
都知楊皓懷姦兇恣刺面杖脊配吉州和州防禦使內
侍省押班黃邁私相朋附決杖編管撫州尋送皓撫州
邁常州居住是歲建寧府汀州水階成西和鳳四州及
淮東旱振之

三年春正月乙巳朔帝有疾不視朝庚戌蜀秀州上供
米四萬四千石歲蠲四川鹽酒重額錢九十萬緡出度
僧牒二百收淮東鐵錢丁巳命夔路轉運使通融漕計
糴米以備凶荒壬戌罷文州民雜役詔輔臣代行恭謝
之禮二月甲戌朔復以兩浙犒賞酒庫隸戶部丁酉申
嚴錢銀過淮之禁閏月丙午祭鄆縣新作寺觀甲寅以

王藺為端明殿學士四川安撫制置使藺辭不行壬戌
詔州縣未斷之訟監司毋得移獄違者許執奏甲子成
都府路轉運判官王漑以代民輸激賞等絹錢三十三
萬緡詔進一官仍令再任詔賣郡縣沒官田屋及營田
三月甲戌修天長縣城辛巳帝疾稍愈始御延和殿聽
政以子濤為安定郡王甲申罷雅州稅場五築峽州城
乙酉留正乞去位不許庚寅宜州蠻寇邊改知鬱州沙
世堅知宜州以討之辛卯復監司列薦法丁酉罷廣東
增收鹽斤錢巳亥詔技藝補授之人毋得奏補著為令
庚子監察御史郭德麟以察事失體出為湖北提舉常

平茶鹽夏四月癸卯補童子吳綱官甲寅振四川旱傷
郡縣乙卯以戶部侍郎丘宗爲煥章閣直學士四川
安撫制置使戊午帝朝重華宮丁卯蠲臨安民元年二
年逋賦五月帝有疾不視朝乙未命漢陽荆門軍復州
行鐵錢己亥蠲四川水旱郡縣租賦仍以兩浙犒賞酒
庫隸諸州令戶部郎官提領歲以四十五萬緡爲額庚
子晦常德府大水入其郭六月辛丑朔下詔戒飭風俗
禁民奢侈與士爲文浮靡吏苟且飾僞者以權禮部尚
書陳騏同知樞密院事甲辰遣錢之望等賀金主生辰
丁未罷四川諸軍歲起丁未廢光州定城監壬子慮囚
戊午以伯圭爲太師甲子增捕獲私鑄銅錢賞格丙寅
以太尉郭師禹爲少保秋七月己巳刺沿邊盜萬人爲
諸州禁軍壬申監文思院常良孫坐贓配海外益國公
周必大坐繆舉良孫降滎陽郡公省廣西郡縣官甲戌
台州水壬午瀘州騎射卒張信等作亂殺其帥臣張孝
芳甲申軍士卞進張昌擊殺信增嘉王府講讀官二員
壬辰脩揚州城八月甲寅詔兩淮行鐵錢交子戊午總
領西川財賦楊輔奏已蠲東西兩川畸零絹錢四十七
萬緡激賞絹六萬六千匹詔獎之自是歲以爲例九月
甲戌脩德安府外城乙亥金遣僕散端等來賀重明節

戊子遣鄭汝諧等使金賀正旦丙申勸兩淮民種桑冬
十月壬寅脩大禹陵廟丙午脩潭州城辛亥帝詣重華
宮進香庚申會慶節丞相率百官詣重華宮拜表稱賀
十一月壬申振襄陽府被水貧民癸酉減蘄州歲鑄錢
二十萬緡丙戌日南至丞相率百官詣重華宮拜表稱
賀兵部尚書羅點給事中尤袤中書舍人黃裳皆上疏
請帝朝重華宮吏部尚書趙汝愚亦因面對以請帝開
納辛卯帝朝重華宮皇后繼至都人大悅癸巳蠲湖南
北京西江西郡縣月椿經總制錢歲二十三萬餘緡戊
癸卯帝幸羣臣上壽皇聖帝玉牒聖政會要于重華宮
丙午蠲歸正人賦役三年辛亥以留正爲少保乙丑金
遣溫敦忠等來賀明年正旦是歲江東京西湖北水
四年春正月己巳朔帝朝重華宮辛卯蠲臨安府民身
丁錢三年二月戊戌朔詔陳源特與在京宮觀丙寅貸
淮西民市牛錢出米七萬石振江陵饑民甲戌皇孫生
三月丙子帝朝重華宮皇后從辛巳以葛邲爲右丞相
胡晉臣知樞密院事陳騏參知政事趙汝愚同知樞密
院事甲申監察御史汪義端奏汝愚執政非祖宗故事
請罷之疏三上不報辛卯義端罷癸巳帝從壽皇聖帝

壽成皇后幸聚景園乙未脩巢縣城夏四月己酉罷括
賣四川沿邊郡縣官田五月丙寅朔復永州義保己巳
賜禮部進士陳亮以下三百九十有六人及第出身進
士李僑年五十四調成都司戶參軍自以祿不及養乞
以一官回贈父母帝嘉其志特詔以本官致仕父母皆
與初品官封丙子淮西大水丙戌紹興大水召浙東總
管姜特立丞相留正以論特立不行乞罷相不報壬辰
太尉利州安撫使吳挺卒四川制置使丘宗承制以總
領財賦楊輔權安撫使命統制官李世廣權管其軍六
月丙申朔留正出城待罪振江浙兩淮荆湖被水貧民
戊戌祕書省著作郎沈有開著作佐郎李唐卿祕書郎
范黼彭龜年校書郎王夔正字葵幼學顏棫吳獵項安
世上疏乞寢姜特立召命己亥遣許及之等賀金主生
辰壬寅詔市淮馬克沿江諸軍戰騎戊申胡晉臣薨己
酉御後殿慮囚癸丑蠲臨安增民稅錢八萬餘緡甲寅
太白晝見甲子雨雹秋七月乙丑朔太白晝見丙寅大
雨雹己巳留正復論姜特立繳納出身以來文字待罪
于范村丙子以不雨命諸路提刑審斷滯獄戊寅命臨
安府及三衙決繫囚釋杖以下壬午以趙汝愚知樞密
院事吏部尙書余端禮同知樞密院事陳源爲內侍省

押班癸未禁邕州左右兩江販鬻生口乙酉叙州夷賊
沒該落無等寇邊遣兵討平之八月丙申蠲紹興丁鹽
茶租錢八萬二千餘緡丁酉罷郡縣賣沒官田癸丑詔
三省議振恤郡縣水旱丁巳贈吳挺少保其子曦落階
官起復濠州團練使帶御器械戊午振江東浙西淮西
旱傷貧民九月己巳命遣董師中等來賀重明節庚午
重明節百官上壽侍從兩省請帝朝重華宮不聽己卯
上壽聖皇太后尊號曰壽聖隆慈備福皇太后壬午遣
倪思等使金賀正且甲申帝將朝重華宮皇后止帝中
書舍人陳傅良引裾諫不聽戊子著作郎沈有開祕
書郎彭龜年禮部侍郎倪思等咸上疏請朝重華宮冬
十月丙午內教三衙諸軍己酉朝獻于景靈宮夜地震
庚戌朝獻于景靈宮夜又震壬子祕書省官請朝重
華宮疏三上不報甲寅申土工部尚書趙彥逾等上疏
重華宮乞會慶聖節勿降旨免朝壽皇曰朕自秋涼以
來思與皇帝相見卿等奏疏已令進御前矣明日會慶
節帝以疾不果朝丞相葛邲率百官賀于重華宮侍從
上章居家待罪詔不許嘉王府翊善黃裳上疏請誅內
侍楊舜卿臺諫張叔椿章穎上疏乞罷黜戊午太學生
汪安仁等二百一十八人上書請朝重華皆不報己未

丞相以下奏事重華宮庚申帝將朝重華宮復以疾不
果丞相以下上疏自劾請罷政彭龜年請逐陳源以謝
天下皆不報十一月辛未日中有黑子壬申侍從兩省
趙彥逾等十一人同班奏事癸酉太白晝見地生毛夜
有赤雲白氣戊寅帝朝重華宮都人大悅遣右司郎官
徐誼召留正于城外庚辰正始入朝復赴都堂視事命
姜特立還故官日中黑子滅癸未帝率羣臣奉上皇太
后冊寶于慈福宮十二月戊戌帝朝重華宮壬寅右司
諫章穎以地震請罷葛邲疏十餘上不報甲辰命沿邊
守臣三年爲任已酉詔監司帥守毋獨員薦士庚戌趙

雄薨甲寅復四川鹽合同場舊法丁巳振江浙流民已

未金遣完顏弼等來賀明年正旦

五年春正月癸亥朔帝御大慶殿受羣臣朝遂朝重華
宮次詣慈福宮行慶壽禮推恩如淳熙十年故事癸酉
壽皇聖帝不豫丙子大理獄空癸未葛邲罷丙戌寬紹
興民租稅二月乙未趙汝愚余端禮以奏除西帥不行
居家待罪戊戌荆鄂諸軍都統制張詔爲成州團練使
興州諸軍都統制庚戌禁湖南江西過糴三月癸亥合
利州東西爲一路己巳壽成皇后生辰免過宮上壽夏
四月甲午帝幸玉津園皇后及後宮皆從乙未壽皇聖

帝幸東園丙申史浩薨巳亥朝獻于景靈宮壬寅以不
雨命大理三衙臨安府及兩浙決繫囚釋杖以下癸卯
雨土甲辰侍從入對請朝重華宮巳酉太學生程肖說
等以帝未朝移書大臣事聞帝將以癸丑日朝至期丞
相以下入宮門以俟日昊帝復以疾不果出侍從館學
官上疏乞罷黜居家待罪職事官請去待罪者百餘人
詔不許丙辰侍講黃裳秘書少監孫逢吉等再上疏以
請丁巳起居郎兼權中書舍人陳傅良請以親王執政
或近上宗戚一人克重華宮使臺諫交章劾內侍陳源
楊舜卿林億年離間兩宮請罷逐之五月辛酉朔辰朔
盜賊寇邊甲子侍從入對未得見宰執詣重華宮問疾
不及引陳傅良繳上告敕出城待罪丁卯以壽皇聖帝
疾棘命丞相以下分禱天地宗廟社稷戊辰丞相留正
等請帝侍疾正引裙隨帝至福寧殿久之乃泣而出辛
未丞相以下以所請不從求退帝命皆退於是丞相以
下遂出城待罪知閣門事韓侂胄請宣押入城許之追
封史浩爲會稽郡王乙亥帝將朝重華宮復不果戊寅
以壽皇聖帝疾赦權刑部尚書京鏗入對請朝重華宮
庚辰丞相以下詣重華宮問疾癸未起居舍人彭龜年
叩頭請奏事詔令上殿乃請朝重華宮甲申從官列奏

以請嘉王府翊善黃裳講讀官沈有開彭龜年奏乞令
嘉王詣重華宮問疾許之王至重華宮壽皇爲之感動
丙戌權戶部侍郎袁說友入對請朝重華宮六月遣梁
總等賀金主生辰戊戌夜壽皇聖帝崩遺詔改重華宮
爲慈福宮建壽成皇后殿於宮後以便定省以重華宮
錢銀一百萬緡賜內外軍先是丞相留正知樞密院事
趙汝愚參知政事陳騏同知樞密院事余端禮聞壽皇
聖帝大漸見帝于後殿力請帝朝重華宮皇子嘉王亦
泣以請不聽至是丞相正等聞壽皇聖帝崩乃率百官
聽遺詔于重華宮己亥丞相以下上疏請詣重華成禮

庚子遣薛叔似等使金告哀辛丑丞相率百官拜表請
就喪次成服壬寅壽皇大歛皇子嘉王復入奏事詔俟
疾愈過宮行禮丞相以下請皇太后垂簾聽政不許請
代行祭奠禮許之仍有旨皇帝有疾聽就內中成服夜
白氣亘天乙巳尊壽聖隆慈備福皇太后爲太皇太后
壽成皇后爲皇太后己酉白氣亘天乙卯遣林湜等使
金致遺留物秋七月辛酉丞相留正稱疾乞罷政遂逃
歸初正等屢請立嘉王爲皇太子帝許之正擬指以
進奉御筆歷事歲久念欲退閑正得之大懼乃謀退焉
甲子太皇太后以皇帝疾未能執喪命皇子嘉王卽皇

帝位于重華宮之素幄尊皇帝爲太上皇帝皇后爲壽
仁太上皇后移御恭安宮慶元元年十一月戊戌上尊
號曰聖安壽仁太上皇帝六年八月庚寅太上皇帝不
豫辛卯崩于壽康宮年五十有四十一月丙寅諡曰憲
仁聖哲慈孝皇帝廟號光宗嘉泰三年十一月壬申加
諡循道憲仁明功茂德溫文順武聖哲慈孝皇帝
贊曰光宗幼有令聞嚮用儒雅逮其卽位總權綱屏嬖
幸薄賦緩刑見於紹熙初政宜若可取及夫宮闈妬悍
內不能制驚憂致疾自是政治日昏孝養日怠而乾淳

